

章施於子孫庶幾得翁之爲人也

新增藝文

請量遷教職疏

盧秉純 邑人

爲敬陳管見事竊惟科目出身之縣令其因材力不及  
改選教職者本我

世宗憲皇帝曲爲矜全不忍棄置之至意而轉爲各省督撫  
易於驅遣毫無顧惜之便途或半年或數月輒以書生  
迂拘題改教職迫於改教之員太多

世宗憲皇帝欲令引見而督撫之題改者頓減於前此種情

形諒已久在

聖明洞鑒之中矣臣以改教諸員委係拙滯短於吏治者固不乏人而其中未必盡才力不及之人也或不善逢迎趨附失上司之歡心以致勒令改教者有之或名節自愛不肯與奔競巧捷之徒追隨俯仰情願改教者有之至於一經改教總其人悉心極力整飭文教而本省督撫以由縣令而改教職不便復爲保舉竟使淪棄終身殊爲可惜我

皇上仁育萬邦雨露無私凡被叅無據之廢員現許查照往例具呈都察院以憑核明彙奏引

見請

旨此等改教之員現任職事與解任回籍者似爲有間且教官訓士非但講明理學卽政治事功亦所研究教學相長豈無化短爲長之處一省所轄百十員中豈無一二可復用之人似當量爲遷擢以示獎勵倘蒙

皇恩令該督撫於每省之中或許酌薦數員觀其才猷以

待錄用或於計典之中准其擢薦或於俸滿之日酌量  
 陞遷臣知既退復進之人其感激圖報必更切於初登  
 仕籍之年而講習更歷之餘其練達老成必不等冒昧  
 任事之日蓋生當

聖明之世凜凜焉無一人敢於自恃者亦欣欣焉無一人

忍於自棄也臣愚昧之見是否可採伏乞

皇上睿鑒施行

龍鬪峪華公廟記

王應吉邑人

襄治以西山之列也若翠屏然薄南為龍鬪峪相傳曾  
 有二龍相鬪故名峯巒峭絕松檜鬱森誠神棲之所也  
 入峪數里許飾宇塑像稱佗郎神云蓋以為漢神醫華  
 公佗也或曰大郎者訛也佗廟豎此不知始自何年第  
 覽本傳佗沛國譙人也曉養性之術年且百歲而貌有  
 壯容醫法精絕至有斷腸刮骨而人獲全者故迄今以  
 神醫稱而佗廟豎此豈亦後之人慕而崇之與歲時清  
 明祓者常數萬人余至其處因改焉止見一碑曰現應

碑之記許兒以病幾危其父詣神而祝之明日兒忽口  
代神言傳其方藥凡若干味且曰吾某也特救爾病當  
不日愈已而果然然余知神之英靈果寓於此蓋昭乎  
其顯且明也於戲哉神功之普茲可推矣一許兒詎盡  
乎神耶竊按周禮十全爲上十失一次之十失二次之  
十失三次之十失四爲下夫醫之下十全乎六而神之  
功斬於一兒殆非然也今其方藥之傳獨於孺子乎及  
之他無聞焉何哉試觀水藏地下靡所不有猶精神命

脈流通於胃腸肢骸者然第人不獲盡見耳迨湧而爲  
泉出之山下亦一氣之餘洩若曰水專在是則舛矣神  
於孺子亦山之泉耳庸足爲神限哉矧神在當時通數  
經舉孝廉當衡者辟而不就又不專爲瑣瑣方技者流  
生無遺行則設有顯靈昂於太虛罔所止界諒不以許  
之一祝而私厥子矣嗟夫彼穹者神曷其有私倘行負  
神明數數焉惟神之廸保是祈亦徒耳苟爲善神必陰  
騭之矣曹翹曰民和而後神降之福范文子曰德福之

基也無德而受福猶無基而築墉也其壞也無日矣旨哉斯言列於君子之林者味焉若云如俗傳而已也不已蹈藏孫氏之故習乎有識者詳焉或以余言爲不謬

姑汾書院碑記

陳朝書 邑令

古者廣學校以造人材國有教遂有序黨有庠家有塾按古侯封百里不過卽今之縣屬而學校之設如此其廣故其時人無不學其學者得以成就人材而進於道我

國家文治昌明道化覃洽太學及府州縣學亦旣備矣又命直省廣置書院所以陶成多士者典至隆也顧省會書院有

頒發帑金以資廩給而郡縣勢不能徧逮其通都大邑捐之守宰輸之士民俱不踰時克舉獨褊小之區物力維艱而長吏亦往往畏難而安焉襄邑爲陶唐氏畿內之地士樸而愿文風初不下於列郡然而挾策吟咏之子或以窶貧而不能肆其力或偏處一隅寡聞見而不克

底於成儒效濶疎人材放失伊誰之咎歟蒞斯土者職  
在牧民訓士尤當仰體

聖天子敷教之盛心有以誘掖激勵漸摩成就以備公卿  
大夫百執之選未可執掌簿書遂視爲不急之務而苟  
以自諉矣邑有姑汾書院僅存其名而已余下車訪尋  
故址不可得儒學教諭孫君孝純訓導李君岳縣尉陳  
君在中與余有同心計圖興復但卜築之費不貲而脯  
修膏火諸需所當爲之策久長者未易一朝辦也遲之

明年迺進都人士謀之僉曰是我襄人士之心也請亟  
行余捐俸爲倡都人士亦各輸私錢以助共得三千金  
有奇乃舉劉文純崔星梁遂等諸紳士司捐項出入而  
董其成工興於甲申夏五月旣望告竣於是年之季冬  
先是周覽地輿購得徐氏別業廣袤若干步位巽面離  
汾水環於左姑山峙其右鍾毓靈秀佑啟文明豈偶然  
哉其講堂廓如其學舍奧如有亭翼然有池淵然曲水  
流清喬木聳翠蓋無畫棟雕梁之盛而因地之形盡人

之力以成茲勝概有適相當者榜其門曰姑汾不忘舊也俾邑之士子晦明風雨絃誦其中生意滿前會心不遠相與藏焉修焉息焉游焉而爲之師者仰鹿洞鵝湖之範爲之弟子者懷春風化雨之思士品文風進而彌上也其亦可拭目俟與嗟夫學術之敝也日從事於語言文字之末而躬行幾不與焉矣附會六經逞其胸臆固執一義遂其偏私聽其言則賢人無以過攷其行則庸夫有不爲至於探賸索隱反操入室之戈鬪靡誇多

徒艷雕蟲之技雖讀書破萬卷亦何益之與有凡余之所以經營圖度而務望於諸生者則在反求之身心之內實踐之日用之間經義治事程其功正誼明道見其志毋盜虛聲毋希速化毋始勤終惰毋見異思遷毋徇人而枉己毀方易圓不守律度準繩之正毋外君子而內小人假仁借義貽害於性情心術之微敬業樂羣相觀而善則閭邑之士風丕變而羽儀

盛世黼黻

皇猷用以輔文治而俾道化者不外乎是諸生其勉旃茲因工成誌經始落成之歲月並述所屬望之意勒之於石而都人士以崇儒嚮道之誠抒樂事勸功之懷皆不可沒乃善也

重修姑汾書院碑記

周貽組 邑令

邑有姑汾書院由來久矣乾隆丙戌歲邑令西蜀陳公訪其遺址倡修重建講堂學舍規模巍然迄今四十餘年邑諸生春夏絃誦得以藏修息游焉顧歲時遷易難

免風雨漂搖兼以東西兩隅房舍缺如歷任諸君皆有  
 意興修而未逮也余於己巳冬來宰是邦下車以來接  
 見都人士輒以興復義學自任適邑中紳士有願捐資  
 修理之舉爰庀材鳩工經營補築因其費而董成之並  
 自捐俸金添置桌几若干以為儒生肄業之具夫有廢  
 必舉有善必彰此牧民訓士者之責也矧襄邑士風彬  
 彬可造比歲擢高第者科不乏人將由此而輪奐彌新  
 其擴充正未可量尤為蒞斯土者所深望歟至於延師



課士月有薪水歲有廩糧又當從容圖書以待後之同志倡捐而籌備云

重修姑汾書院碑記

王逢壽 邑令

書院之設所以儲英才廣教化也我朝崇儒重道文運聿新多士蒸蒸於今爲盛凡有守土之責者皆當仰體聖天子作人之至意以化民成俗爲先而化民之道舍講學其安從哉道光己丑歲余蒞茲土月課諸生童於姑汾書院見其堂宇傾頽垣墉圯毀不可以列几席庇丹

鉛每思有以新之而蓄諸心未形諸議也後數月縣試童生假城隍廟爲考棚一切几磴器具皆民間供給民甚以爲苦詢之書吏皆謂舊規如此不容易也余念書院前多隙地重修書院卽可以創建考棚士子旣得紘誦之區考校亦免供應之費豈非事之至便哉爰進邑之紳士相與謀曰書院爲合邑文教所關而鞠爲茂草非所以育羣才也考棚爲俊秀登崇之地而屢假神祠非所以慎選舉也茲欲仍其舊基擴其規模合書院考

棚而一之可乎眾咸以爲然而苦於無人倡率余乃急  
捐廉一千兩以爲好義者勸一時紳士居民聞風興起  
莫不踴躍樂輸以助興築又念資財之重非老成者不  
可託工料之費非諳練者不能司因擇於紳士中得誠  
篤者數人使董其事官吏胥役皆不與焉於是儲塹垣  
之具購斲削之材其他屋宇所需者無不畢備乃修後  
院起講堂次及左右廳事於諸生肄業之所門闕引壁  
俱新之復於前院創建考棚十數間列坐編號每值考

課之期可以庇風雨亦可以謹關防士民咸謂人材可  
興也體統可肅也科派可免也一舉而三善備焉經始  
於道光十年四月落成於道光十一年十月邑紳士具  
興工竣事顛末入告於余謀勒石以垂久遠並祈爲文  
以記之余曰是舉也豈徒使諸生握管操觚但求獵取  
功名乎抑尋章摘句爲訓詁文辭乎蓋人材者風化之  
源也襄邑爲陶唐故都勞來匡直之化猶有存者必講  
明正學遠追精一執中之傳斯學之爲孝子學之爲純

臣卽偶形爲政事文章亦無不卓然可述此諸生之所宜勉實余振興書院之本心也至於肇始之由與山水羅列之勝前人述之詳矣余不復贅

重修學宮碑記

李鄴書 邑令

邑之當修葺者曰城垣曰倉庫而學宮爲最學宮者先聖先賢之所憑依士於是端厥習民於是觀厥化蓋一邑首善之區也余職斯土適時和年豐辛酉秋學師郭君杜君商修廟事余曰善遂召諸生並諭里民之好義

者議之莫不踴躍樂輸因於紳衿中擇其老成謹篤者董厥事自大殿戟門明倫堂尊經閣咸改而更張之庶祠齋房相其折棟圯瓦而葺之墻垣補築之廟中之享祀祭器新之凡閱三十旬而成費節而工備其用實也夫襄邑攬姑汾之秀密邇堯都人文蔚起俗美風厚亦固其所顧民風之興肇於士習當茲因循旣久而於首善之地球度削屢是亦振作之一機也然則是役也其非黜聖丹漆徒爲觀美之謂其謂爲人師者朝夕講誘

其中俾諸生知聖賢之真毋心利欲以自汨其愛親敬  
長之良而肄業者亦當顧名思義堂何以顏明倫齋何  
以顏正心誠意殿廡中之配坐享祀者若而人祠宇中  
之鄉賢名宦忠義者若而人循名責實奮然思興將前  
人之道德文章人品心術時往來於胸中實而體之靜  
存動察之際由是處則爲入孝出悌之人出則爲明體  
達用之士更令鄉先生如董事諸賢卽以所聞者歸而  
教其子弟親黨使之崇本務而重實學庶士習端民風

可以丕變李吁江袁州學記曰譚禮樂以陶吾民會南  
豐爲宜黃學記亦曰材成則三公百官得其士俗成則  
刑罰措余將以斯役爲士習民風之權輿也是爲記

重修三教廟碑記

王道仁 邑人

三教神像自坤變以來剝落幾盡屢欲重修以肅觀瞻  
奈災傷之後未遑及也至辛亥之歲獻圖鄭君等咸謂  
村中諸凡盛事已漸就理獨三教神像闕焉茲值時和  
年豐曷急圖之衆皆欣然樂從或輸其材或輸其力爰

擇日起工搏土而肖像焉歷年有五工告成神像莊嚴  
金碧輝煌拜其下者咸肅然生敬焉諸公喜曰今而知  
神道設教之意無非欲人觸目驚心耳余曰然然余猶  
有記焉按孔子生於周末靈王時釋迦生於周初昭王  
時老子則與孔子同時而年差長焉孔子之道自秦火  
後不絕如綫幸漢儒董子輩倡明其理而孔子之道復  
明至宋儒周張程朱發其精微抉其義蘊而道遂大著  
於天下故漢時有郡縣建廟之詔而歷代以來崇祀者

且遍大地釋迦自漢明帝時有番僧以白馬駝經至中  
國止於寺遂有白馬寺等名嗣後一盛於梁再盛於唐  
而佛骨一表韓文公所以有潮州之行也老子之後和  
之者有莊周曹參等而奉之者有梁孝元暨北宋諸帝  
或戎服講老子或禁苑建宮觀甚而輕天子之尊重道  
君之稱故丹書跪進王文正所以有美珠之賜也至以  
我孔子與釋老並列爲三教且同堂而祀之則實昉於  
何時然余嘗爲之外畧其形跡之異內證其心源之同

而知三教之提撕乎天下者理實出於同原而並行不悖昔人有言曰孔子六經之訓忠孝履其平李老六篇之言道德創其首瞿曇三藏之文慈悲爲其本是其言雖殊而過欲存理則三教實同一操修也乃後之人有謂道不如佛之大佛不如道之尊道佛不如儒之正者是不惟不明三教合一之旨抑實不善學夫三教者也能善學之則吾儒之道固爲齊治之根本而釋老之道亦可爲修身之借資苟不善學之勿論釋老之教爲異

端足以害已而禍人卽吾儒被服孔子稱說詩書而蕩檢踰閑干名犯義又豈非孔子之罪人乎我朝崇儒重道以王號追封孔子五代而又頒持三教之論貴得其平之論大哉王言直洞悉乎三教本原之同而執一隅之見者自不敢置喙於其間矣余忝爲孔子之徒身列衣冠終日兢兢惟恐名教不容又何敢妄分雌黃以獲戾於先聖取譏於後賢也耶諸公曰是宜文諸石以垂永久余曰此不足以言文也然以首事者之勤勞與樂

輸者之功德大不可沒也即取而並書焉亦無不可

孫厚菴德教碑

翰林  
檢討董文渙 洪洞人

夫子既沒之三載門人廬墓者將歸泣相告曰心喪已矣吾儕且去矣今而後雲散風流各尊所學以行其志並廬夫子墓亦不可得矣嗟乎深思莫報傷如之何或曰夫子告養歸里設科造士門墻之盛幾與鹿洞鵞湖相埒諸君親炙垂廿年欲表服膺之誠盍壽其教於石俾後學得瞻山斗識津梁豈不懿歟僉曰善爰自庚午

冬礪石閱一年告竣同人以 渙 從學最早且久知之也

詳屬紀其事

渙

憶請益時夫子方弱冠舉於鄉嘗訓

渙

曰讀古人書在明大義求實踐學其學即思行其行苟得志於天下則傳說之霖召伯之棠皆分內事即其窮也亦當考道名山傳諸其人為一代儒宗嗚呼是可以知夫子之學之教矣然此僅發諸言猶未見諸行耳及捷南宮登黃甲當咸豐初元

朝廷方勵精圖治重明刑選新進召對拜秋曹主政之

命弼教三年常存哀矜多平反大獄考績報最司寇器重  
之方將列薦章授大任展厥經綸爲斯世舟楫而夫子  
以親老家貧毅然陳情乞養人咸惜之夫子曰否否天  
下忠臣皆天下孝子爲之且吾黨有人定省之暇得英  
才而教育之使用於世以發吾志所未逮行吾孝是亦  
竭吾忠矣何惜爲且夫窮達者命也達而窮者遇也不  
戀戀於達而退處於窮以行其心之所安者則君子之  
權也夫子蓋權於爲臣爲子行道傳道之間覺爲子之

日短而傳道之心切故其志也堅其歸也決由是天倫  
叙樂林下優游日以著書自娛而慕之者若東雍若高  
梁若霍陽以及父母之邦州牧邑侯爭延主講席師事  
之所至循循善誘人才輩出教先器識文藝次之故出  
其門者飛黃騰達或爲翰苑名流或爲郡縣循吏卽後  
生小子一經提命則言談舉止雅飭絕俗識者以爲有  
安定弟子風向使夫子得享髦齡再出東山慰蒼生望  
則霖雨甘棠何難及身親見乃天奪之年不使克竟其



襄陵縣志 卷之二十四  
用也悲夫雖然夫子有子能世其業允迪前人光以繼  
我夫子未償之初志夫子為不萎矣明德之後必有達  
人春風化雨豈第在公門桃李哉

重修河伯廟碑記

前福建  
巡撫

徐繼畲

五台人

皇上御極之六年山西巡撫臣王以襄陵汾河驟漲阻賊  
護衛民生顯著靈異奏請加河神封號

詔封汾河之神 欽加乂安二字蓋曠典也先是襄陵城  
濱汾河城外築大堤捍水堤舊有河神廟隘僅一椽歲

久將圯咸豐三年秋八月粵賊萬餘由懷慶竄入垣曲  
連破絳縣曲沃洪洞圍平陽城勢如風雨襄陵距郡城  
二十餘里礮聲砰訇相聞夜則火光燭雲漢是時宰襄  
陵者為興國州劉公率士民登陴守禦顧城小糾壯丁  
不逾數百人又承平久民間不見兵革慮賊虜至勢將  
瓦解默念賊勢不能久獨汾河暴漲地無舟筏賊不能  
渡危城或可保因涕泣默禱於水神是時天久晴望西  
北上游諸山亦無雲氣忽夜半水驟漲瀾漫洶湧瀾至

襄陵縣志卷之二十四  
里許時八月初九日也尋有賊騎數十至河濱探測再三徘徊而返賊於是日屆平陽城連日遣騎探水水漲如故至十四日賊由沁源東竄入上黨而河水卽於是日驟落襄民額手稱歡謂河神之祐我生民也余謂襄民之獲免於難固有數存然以不雨之天消涸之水無端驟漲至四日夜之久較之反風滅火尤爲神異固神之哀我襄民顯爲呵護而非劉公之至誠感神亦胡能響應若此耶公於事平後欲鼎新神祠以報靈貺旋去

任量移平遙意不能忘捐廉付襄陵紳士使庀材鳩工而申報其事於院司中丞王公據以入奏迨部議上得諭旨錫封號而襄陵紳士適報公謂神之靈蹟不可湮囑余爲文以記之於右

襄陵縣紳士捐賑碑記

韓 燁 邑令

嘉慶九年平陽所屬臨汾洪洞曲沃太平翼城襄陵皆被旱災奉上開倉平糶秋停徵十年三月 燁 補襄陵任見民有饑色心甚測然卽捐廉賑粥城鄉共設七厰確

查實在乏食者登册給籤領粥其年老患病暨少年婦女不便遠涉者計每日應領之粥折米著五日總領一次自三月二十四日起至五月初十日止是歲秋禾復被旱成災 大憲入奏

皇上特沛恩綸先撫恤次大賑復加賑並蠲緩錢糧又自十二月十五日起設立粥廠至次年四月又加賑至六月止並奉藩憲告示道府札飭勸捐煇即於十一年正月同委員秦公及兩學呂公杜公捕廳胡君在城隍廟

公所勸捐旬日間共上銀壹萬貳千柒百壹拾八兩遂令河東河西總理紳士仍在公所收銀先諭每村紳耆各二三人於領粥貧民之外尚有實在艱困者秉公核實清查另造册毋遺毋濫其戶口多寡以大小中村爲差不許鄉保人等經手以杜冒濫每大口每月准領錢五百零四文所收捐銀即令總紳士在城鄉各鎮易錢以便各村就近領取每村每月散畢一次即將戶口花名錢數謄寫清單實貼村門俾共見共聞自始至終凡

銀錢出入皆各紳士經營並不假手胥吏儘數散畢後將某村若干口每月散銀若干闔縣若干村共若干口統共散過錢若干散數總目條分縷晰粘單榜示俾眾咸知是年大有秋今年夏麥又大稔輝始寬厥心因補叙其事曰嘗聞周禮五族相救五黨相賙蓋里黨周急之義自古爲昭也今人見禽獸饑欲死尙有惻然不忍之心而况於人爲同類見行路者有菜色尙欲解囊以救而况地爲同鄉見橋梁傾圯道路崎嶇不惜捐貲修

整而於貧民升合之需得之則生弗得則死以此較彼孰輕孰重孰緩孰急必育能辨之者然而素封之家每欲留有餘爲子孫計試思日擊死亡流離之困忍而不顧其能保子孫之長享有餘乎卽家僅小康並無盈餘但出三四金在已尙不至饑斃而已可救三四目前之命噫凡人存好善之念必待有餘而後爲之則何時而可襄邑風氣純樸近古慷慨樂施者固眾卽勉強從事者亦不失爲善人今幸年歲豐登民氣復蘇共享太平

之福當感念

帝德如天賑恤蠲緩有加無已而此邑之神耆士庶咸沐  
聖天子子惠元元之至意而翕然觀感同里相恤誼篤桑  
梓有足嘉者爰書名立石以垂永久且爲樂善好施者  
勸

朝陽洞護法殿碑文

楊維棟 邑人

往時九日携友至朝陽洞坐上室南望陽坡小阜紅葉  
黃花牧豎樵唱因誦余伽藍殿裏與金階句與到語也

其後二年主僧太眠募得金錢於其南建護法殿三間  
且曰如門斯屏如箕斯舌冥制色相了無着也完固風  
氣永無剝也余應之曰然夫心卽佛也降伏自心何庸  
金甲寶杵護法將軍也今之建者序者從其教而應之  
而完固冥制之說亦豈盡可廢哉他日過之借爾束茅  
題余舊句不知可引例金帶山門之故事乎否也始於  
乾隆十年三月間成於乾隆十二年二月十五日是爲

記

重開上汧吞河渠興利除害碑記

孫成基 邑人

從來治水爲農田所首重利之所在人思興之然興利而不先弭害則趨利之地卽爲釀害之尤甚可懼也北梁村東南舊有上汧吞河一渠源出浮山峪派分五支自巽方繞至乾地其利與幸院孫家院共之灌田千百畝自昔然矣迺曩時二支五支渠路由北梁村中經過每值山水衝激過當室廬爲毀衆有其魚之慨以故渠道開而復閉屢經數手迄無善策致使稅輸上上而餘

潤未沾吾農民其何以堪此咸豐庚申夏適值大旱衆皆憂懼不知所出幸賴鄉長喬公庚郭公念宗喬公長久先後集衆向予商度予曰向之被害以水由村中行也今欲防其患盍於村之東西兩旁改濬二渠令水繞村而過併將舊日渠路堵塞增高斯可以享水利無滋水患豈非居耕兩益之計乎衆僉曰善遂公舉渠長渠首各紳耆公同妥辦合毗連三村之力成一日百年之功除新開二渠係攤費購地疏通外其餘支三渠悉踐

舊跡而重濬之未敢臆為增減是役也工甫告竣天降大雨灌溉之利波及隣村秋夏二田遂慶再稔於是吾農轉憂為喜而深嘉首事諸公之力為足多也囑余為文記其緣起尤願後之人協力同心守而勿失去其壅塞無為專利庶可奉行無弊垂諸久遠則更幸矣至渠規各條以及公費按田攤派另有簿記茲不復贅云

重修襄陵北館記

孫成基

京師為人文會萃之區凡仕宦舉子僑寓於斯者必賴

有舍宇為安集此會館所由設也余襄正陽門外余家胡同舊有襄陵古館不知創自何人因年遠無考留寓客賈從中覬覦遂據為已有歷數十年矣余自庚戌通籍供職秋曹理論諸逐末者先後搬去仍在北城暨街道廳署報明修葺當即闢其草萊重新改造在里在都邀同陳著荈梁丙照諸公彙募銀五百兩有奇益以柴鹿筵農部集捐之數約共六百金擴其舊址改建東西前後各兩院正房過廳廂房對廳共三十間一切工料

所需京蚨近三千貫除募貲不敷用外余自捐廉俸百四十餘金俾得落成忽忽十有七載矣余自癸丑歸田館舍歲修有間已於咸豐己未西院正房偏西一間南後陷毀迨庚申壬戌余兩到京都均以爲期太促補葺未遑嗣於同治甲子嘉平長男毓琇冬官逐班因命擇吉修理而囊空羞澀遲遲至今廣呼將伯集有成數五百金鳩工庀材經始於 年 月 日越數月而工告竣門庭戶壁煥然重新竊幸作述相承數年來艱苦求

濟之志庶藉以稍慰也是爲記

祭八蜡文

錢 墉 邑令

伏惟民以食爲天食以穀爲本所以常陳時夏特著粒民歲卜有秋惟期穀我是民與穀相依爲命而庚與癸豈可頻呼曩者赤地成災民遭塗炭今則蒼天悔禍澤沛恩膏千紅穠稔方期魚夢之占萬綠耕耘共樂鴉鈕之舉維茲鼠耗敢肆鳴張我疆我里任爾潛踪食黍食苗公然逞惡攀條則戕其枝葉鑽穴則害及根株晝而



伏夜而動防無可防類以聚群以分去不勝去閭里驚  
心官民束手顧瞻村落十室業已九空睠念民生一困  
豈容再困伏乞

神威大施法力網不開三毋使抱頭而竄刑惟畫一豈容  
泣血以思殲其醜類護我嘉禾庶有年登太史之書永

蒙

神佑無飢釋

聖人之慮仰副

宸衷顧茲編氓敢為請命尙饗

楊山夫先生墓表

刑部員外郎張道源浮山人

山夫先生姓楊諱維棟字棟也襄陵文學士嗜書工詩  
窮約終其身不求聞達故自號曰山夫負氣節崔給諫  
之獄先生以身從師事之無所顧畏與先大夫為文字  
交辛卯春先大夫偕源謁選北上先生贈詩有匆匆一  
別卽天涯之句明年先生作古先大夫為刻所著在山  
吟詩集行世且召源曰吾與山夫有題墓之約俟其歸

殯當踐之乃言猶在耳而先大夫遽捐館舍追思往訓  
竟成遺命悲夫今其嗣孫繩祖將卜葬先生於其祖塋  
之側爰召石工輦石而暨之墓成先志也嗟夫今人握  
手訂交歡稱莫逆一旦有人琴之感不相過問者曷可  
勝道先大夫與先生既篤於生前復念及身後所以教  
余小子者深矣况先生爲吾鄉詩人尤先大夫所爲拳  
拳者敬述之爲先生表

觀音大士贊

盧秉純 邑人

以聞人以見人以悟入此

三菩薩之得道與吾儒大相契合者也觀自在尋聲救苦  
欲天下皆歸極樂若一人不成佛則願一日不升天其  
願力大矣音而曰觀凡人所不能聲之苦皆可以觀而  
得之故不曰觀形不曰聽音而曰觀音微妙可思奚止  
五官並用之說也且觀人而先觀我觀自在而天下之  
苦皆從一身體認爲仁爲恕又得聖門宗旨儒曰大成  
成以此也釋曰大雄雄以此也性天子不可得聞者

菩薩其先聞之矣敢述所見以獻於法座

關帝會初建樂亭暨永修祀事碑記 崔瀛撰文

今上御極三年春王正月之元日余快夫旭色燦金祥  
風叶玉而晴雲彩霞紛披如錦文五映知是天之清光  
與人之淑氣合而開一昇平新象也竊勤勤山中之願  
薰香盈斗爲宇以內生人祝善而康焉鄧子名弘襟者  
携刺來訪倩余記關帝廟會事余詢顛末鄧子曰是舉  
也始自順治十六年冬糾村衆輸鏹少許月積之歲計

之三閱年所而竣建亭三楹顏曰以和作舞獻地尙餘  
金百有奇可爲每歲荐饗過慮乎後之或鮮終也謀鑄  
石以示之永余曰嘉我鄧子之舉也以侑神明至肅也  
以睦井里至順也以鳩工集力而告成績至勤也具茲  
三善鄧子弗可沒矣尤欲嘉與後人矢此敬神和人之  
意於無艾其願力不綦弘且大歟余得因厥義而進之  
關夫子享有崇祀歷代鉅典煌煌原非一人一隅所得  
私祝然海嶽之廣都會之區與夫名利巖疆崇奉關夫

子而關夫子在下而村墟里社崇奉關夫子而關夫子亦在皇王致以顯封文武貴寮供以寶額崇奉關夫子而關夫子在野叟下士以及走卒稚童崇奉關夫子而關夫子亦無不在所謂干江之月萬里之天人人不得私祝之又若人人可得私祝之乃益以見關夫子之神關夫子之大也第人之所以崇奉者則又有惟文惟實之辨若爲臣而忠爲子而孝爲兄弟而友恭爲朋友而信且義雖未嘗投體飯依朝焚夕醮其爲關夫子門下

弟子無議也不然而徒以牲醴之脂潔儀舞之繁侈冀一邀關夫子之靈奚知神之不吐棄之乎卽我輩讀古人書每卓犖自命異日膺朝廷託肩軍國務當思何以無愧生平何以無負君親何以無得罪神人天地惟時時奉一關夫子於心君座上則處爲端士出爲名臣所以崇奉關夫子者誠不僅頂禮灌獻之文已也余願與鄧子勉焉願與社之衆勉焉且願與宇以內生人共勉弗替焉天之景福聿新而人之康祉方至者想於斯焉

不之外也嗚呼日在天中鑒觀無幽明之隔神能體物  
荐德匪黍稷之馨敢不敬哉敢不永言惟敬哉

康熙三年歲次甲辰孟夏初八日立石

勅封文林郎陝西靖邊縣知縣附貢生劉府君暨顯

妣繼妣張徐武王王五孺人合葬墓誌銘

庚申之歲五月十四日午時我顯考劉府君考終於里第  
孫肇樾肇柸謹視含殮男師亮由京師宗亮由閩喜先後  
聞電返里已不及見十有二日矣十月廿二日卜葬於黃  
崖之阡而以顯妣張徐武王王五孺人祔焉府君諱璞字  
琢章巨川公仲子也曾祖諱訓鄉飲介賓祖諱學閔太學  
生父諱濟南字巨川武生藍翎游擊府君秉性剛直宅心

忠厚博覽群書而書法尤秀勁通神年方弱冠卽補博士  
弟子員大爲督學使者謝公所賞識屢戰秋闈以先祖春  
秋日高乃援例貢成均佐理家政曲意承歡而且友于甚  
摯兄弟之間無間言壬寅補行庚子辛丑恩正併科師亮  
舉於鄉府君率謁祖墓喜極而悲曰兒今倖得功名惜爾  
祖不及見也因泣數行下其純孝蓋出於天性有流露於  
不自知者癸卯師亮選授壺關縣教諭迎養府君於學署  
厥後改選陝西靖邊縣知縣府君得邀恩典勅封如官當

此之時方冀奉迎板輿遊漢唐之故都挹華嶽之清秀誰  
知關中擾攘師亮亦遂東歸不復作出山之想民國四年  
師亮以食指日繁入都辦理礦務荏苒數年宗亮亦委聞  
喜縣第四區行政長竊幸聞喜距家不遠不時可以歸省  
况府君年雖逾七旬而精神矍鑠事必躬親鄉党之人莫  
不艷稱以爲期頤之壽不難致也今歲五月十五日猶接  
初九日慈諭捧讀未畢而驚電忽至云府君有病促令速  
歸十六日買車就道二十五日抵家而府君已歸道山細

詢其病狀肇樾輩泣告曰吾祖十三日午猶食飯二盂晚乘涼於場中觀兒童跳舞歌唱以爲樂二鼓始歸猶與肇樾等夜話數刻乃就寢十四日早起呼僮爇火爲早爨計歸而假寐片時下床拾履頭昏而仆不孝等扶之榻上尙云余心甚慌急以飛金飲我時兒五祖暨諸叔咸集臥室延醫診視凡易三醫皆云脈息無病年老之人靜養卽愈不料痰氣上壅痰下而氣亦絕師亮聆言不能復作一語何天之扼我至於此極也嗚呼痛哉銘曰

黃崖之阡松柏丸丸我先人營兆於斯旣固且安

張孺人本縣鄧邨人無出

徐孺人臨汾北杜邨人光祿寺署正附貢生仰山公女

遼州學正同治庚午科舉人瑞三公胞妹生子一師亮

娶臨汾伊杜邨恩貢生劍秋公女趙氏生子二女一

武孺人臨汾縣城人絳州千總武公女無出

王孺人靈石縣人襄陵城守司魁緒公女甯武營都司

鑑公胞妹生子一宗亮娶臨汾王默邨江蘇如皋縣知

縣鴻軒公女單氏又娶張氏田氏女一適臨汾尉金祿  
王孺人臨汾下靳邨人誥授奉政大夫兆鸞公女生女  
一適太原府知府徐桂芬之子兆鴻

孫二肇樾肇彬師亮出

孫女一肇樾師亮出適衆議院議員神池劉棫

孤哀子師亮謹誌

民國九年十二月一號即庚申年十月二十二日

高畫堂先生墓誌銘

公諱繪畫堂其字籍山西襄陵當明之季有邦佐者參  
遼瀋軍事與沁水張詮懷仁何廷魁同死國難賜諡忠  
節事具明史晉人所稱爲三忠者也是爲公九世祖父  
依庵公學仁本生父宜庵公學義皆質直尚禮以行誼  
聞於鄉公生而端慤宜庵公撫其頂曰是子不苟言笑  
志如成人其將繼忠節之勛光大吾門者耶年十六迨  
於貧棄儒而商時宜庵公已卒依庵公持家計不欲遠  
出乃闢商肆於曲沃權子母營什一之利慷慨樂施意



襄陽縣志 卷之二十四  
三十一  
豁如也而商顧日贏累數千金浸稱素封矣曲沃號三  
晉壯縣四方鐵貨駢集情僞萬端不得其鯁理公一以  
誠接之邑商嘗招健兒教之坐作進退之節以察奸盜  
推公領其衆前後數十年閭井晏然桴鼓不鳴人以是  
知公才而惜其施之不竟也依庵公有二女皆早孀意  
憐之恒觸冒霧露徒步省視公曰是我責也敢以戚老  
人迎兩孀於家使諸甥同子姪輩共案讀比依庵公卒  
公擗踴號呼喪葬視宜庵公有加焉人以是知公德而

惜其潛而不耀也少溺誦讀未冠得咯血疾然研求不  
輟夙儒名流皆樂與共晨夕尤精醫術提囊行診活人  
無算人以是知公學而惜其過而小用也公有丈夫子  
三時豐先公卒次時恒次時臻時臻最以才望顯始爲  
邑諸生以制舉業有聲庠校公曰世變亟矣是何足致  
力其以自熏勞也士生今日當驚其大且遠者於是時  
臻負笈并門從孝感屠鴻臚仁守習夕桀旁要之術道  
旣通而西學專齋建時臻首以高才選入校爲諸生祭

酒其後有西洋留學之行則公老矣然貽書勉勵益切曰吾生平緩形體薄滋味於法當得壽往矣勿吾念也時臻終以公年高故其歸國也獨早時臻直諒寬簡能持大體弟畜諸同學同學者亦擁樹之以爲斗杓民國之興勞烈甚著顧不樂仕進爲山西大學校校長校卽故西學專齋昔年同研席之人猶多在者教職員又秦半舊人也然莫不翕然賓敬願受約束論者以爲難抑公之所貽謀者可知己公生於道光十二年十二月十三

日子時卒於民國六年四月五號午時卽陰曆閏二月十四日也壽八十有五象升以時臻之招脩員本校教習猶憶前年公就養省垣精神矍鑠謂期頤不難至他日交禮而舞於堂下則升也當場其慮以爲之辭庶博長者之一笑不意溘然遂長往也然而家業成就子又象賢求之近代有幾人哉亦可以瞑目於地下矣夫人王氏生三子三女適張者前卒次適趙次適楊孫四不顯早亡丕承前財政廳科員稅捐徵收局委員時豐出

丕基工業學校肄業生丕業幼讀時臻出孫女七曾孫  
 女一王夫人佐公內政白首相莊宗黨烟親以為模範  
 前公卒茲卜於七月七號葬公於村北新塋以王夫人  
 耐禮也時臻書來督銘銘曰施於世者微見一端蘊於  
 中者浩若波瀾夫惟其蘊之充故無始而有終惟其施  
 未竟故不於其身於其子姓宰如者先生冢耶生王之  
 頭不如死士之壟耶天收聲地返熱我銘之訊冥冥

郭象升撰文張瑞琦書丹孤哀子

時恒孫丕基  
 時臻孫丕承  
 丕業瘞石

襄陵喬履三先生墓志銘

先生諱錫福字履三姓喬氏世居襄陵之北梁村祖諱  
 居仁父諱順德世為德桑梓有令名先生生八歲失怙  
 會從父順隆公之嗣族眾議以先生承祧焉先生幼事  
 親以孝稱家貧棄儒就賈既而嗣父年漸高先生歸依  
 膝下代操家政劑有無謹出納先人興後人食者凡三  
 十年而家以裕所居北梁村有上下汧吞河渠發源浮  
 山夏秋霖潦為患頗深先生祖父嘗與村眾相水勢分

二渠環村以時濬疏村人利賴及先生被推管渠事踵前人成規積餘資而爲橋梁起閘堰以時蓄泄更爲之立規約資遵守爭端悉泯樂利同沾先是先生父疾革時深以後世毋斷書香爲誠先生泣頷之子廷棟廷樑生察其慧使讀書以成先志廷棟兄弟先後入邑庠親族咸賀先生曰士生今日而老守牖下詎足免孤陋自封乎於是使廷棟遊學保陽廷樑從師平陽旋游省垣廷棟以法政肄業畢業保定廷樑由省大學高等科畢

業奉先生命升分科頃亦以法科畢業得學士學位先生家居敦內行與人尤肫厚有從父行某者家境貧窘無聊或因事遷怒先生順之無稍忤意旋解及屬纊猶呼先生前曰吾老悖種種願汝勿芥蒂也先生泣謝及卒經紀其喪且完其子女婚嫁至於族党姻戚待以舉火者數十家先生從無德色先生持身務矜慎諸子幼時偶爲梟盧戲先生痛誠之至於對泣村衆化其風率以賭爲戒無荒嬉失業者先生體素伉健不信醫藥鮮

疾病革命以來鬚髮皓白廷棟因省親留家代理家政俾廷樑壹志於學業廷楨資稍鈍因業荒說者擬鄧高密家風諸子習各有業爲先生家方興未艾云先生生於前清咸豐九年三月二十五日今中華民國六年二月十七日卽舊曆正月二十六日辰時疾終里第享壽五十有九歲德配張夫人生子三長廷棟出嗣世父次廷樑畢業時榜名鍾耕三廷楨孫六豐剛愚潛振凱廷樑弱冠時問業於贊好學而能文茲卜以七年三月十

三日葬先生於村北二畛之原甲山庚向先期函來以事狀徵文謹以所述畧加詮次而繫以銘曰孝弟力田漢代攸重夫惟行高乃孚有衆番番先生懿德可誦惠於鄉鄰復周羣從子孫繩繩里鄙歎頌生順歿寧先生曷恫佳城鬱蔥貞石爰礪景行昭銘奕葉無疆 清

史館協脩大學校文科講師

榆次常贊春謹撰

德行教澤碑文

丁酉科舉人張士秀

漢卿王老夫子伯道故里大鄧村人也讀書博聞強識

發奮自雄弱冠入郡庠學術益純秋闈屢荐其如文章  
憎命達何因設帳本村成就後學兼習舉子業脩金概  
不較量鄉人重夫子德公舉紳管充年餘以妨教讀辭  
就范村館數年適太老師謝世洪邑商務棘手夫子繼  
志述事棄儒就商秀先叔素聞夫子品學兼優延聘家  
塾秀兄弟並異姓子弟受學焉文章取清真詩賦取典  
雅講經書得所未聞秀受益深且早僥倖入泮村中聰  
穎子弟感慕願學漸至遠近聞風負笈而來者衆狹隘

難容移帳窻友段旭升塾居兩塾近三十年入泮四十  
餘人其弟相三子炳食餼四子煥入泮未嘗非教澤之  
報也又善醫心切濟世無論貧富皆治之饋謝弗受其  
爲人持身恭儉處世忠厚終身未嘗訟汾東西無不知  
夫子者花甲壽誕秀等恭頌春滿鵝湖匾額壽古稀同  
議立碑夫子辭弗受時由廩生應例考貢忽染沈疴平  
陽府教授李舉行介賓禮榮之而竟捐館矣秀等心喪  
畢議立石作瓣香之祝詎意鄉人友朋過愛僉曰老夫

子教澤德行胡不合勒瑱珉使吾輩名附驥尾而寄遐  
思乎秀等唯唯感謝莫名爰記始末以見夫子德教之  
深而朋友愛戴不忘云爾

光緒三十年三月立

襄陵縣新建東關郭門記

賜進士第大中大夫湖廣布政使司布政使前河南道  
監察御史邑人王應吉撰

余襄城東汾水之所經也汾之上闔闐聯密幾及千室

是爲東關關故有門謹具兩扉前侯東海陳公病其痺  
隘無裨防禦始大其門而更新之洞門重樓足稱鉅觀  
如何暴水西衝汾堤壞而門隨以圯遂使守闕登陴危  
若覆隍而工費詘於財力莫必嗣脩徒有永嘆萬曆癸  
巳今侯汝蔡李公視事之始周覽城垣覩茲惕衷乃屬  
其父老子弟而告之曰斯地斯門所關甚大敝而弗葺  
責在司牧顧帑無羨金民無遺力吾捐俸以始厥事惟  
募義庶臻厥成夫興不可已之功爲此不得已之舉若

屬其善圖之聽其樂輸勿強人以難士庶聞之靡不曰此吾桑梓所依也奈何爲吾父母憂競相勸勉捐各有差共得義金若干兩於是代石陶甃易財僦工物價備值咸取諸此他不一費公乃經画其方畧擇里人督率其工程先以巨石增補堤之崩壞者十餘丈然後夷其宿址廣以新規基長於舊三之一樓高於舊十之二深於舊十之三工始甲午之二月凡八月而告成屹屹崇基堅完可久翼翼層樓閎麗無前西顧則姑山崔巍下

瞰則汾流浩瀚水光山色相映交輝又一邑之勝概也門成今四年公且以徵召行里人謀勒石永公之績屬余記其始末余惟易有重門擊柝之文詩垂未雨桑土之訓蓋先事而預防事有備而無患故設險固藩爲政之宜先也而今之君子則以官爲傳舍爲民之心不能勝其爲己之心是故苟可因循則自託於不擾以幸旦夕之安一切興廢置之不問又爲之辭曰吾非不能辦此多事以招尤孰若省事而息謗嗚呼所以自爲誠得



矣民生奚以賴焉而公興作之政乃在視事之初非切於爲民果於任事而若是乎且費不出於公帑役不徵於編氓捐閭右奇贏之貲成保民永世之利賢於今之君子遠矣或又言東爲生育之方陽明之位疏敞高明則應在人文乃乙未登甲第者三人丁酉登鄉薦者四人從前之所未有則公之此舉所以功德襄人者豈特防禦之資已哉公爲政廉潔詳慎精明仁恕一時循良稱最行拜瑣闥之命建奠安寓內之謨將有太史書之

垂於不朽者此則爲之兆云公名之芳字德馨河南西平縣人登壬辰進士

萬曆二十五年歲次丁午秋七月吉日

賜進士出身誥授奉政大夫晉贈直隸州知州

欽点翰林院庶吉士鹿筵柴公暨德配誥封宜人張宜人合葬墓誌銘

例授文林郎吏部揀選知縣己未科舉人愚弟姚鵬翕頓首拜撰文

賜進士及第戶部右侍郎兼管錢法堂事務前翰林院  
脩撰弘德殿行走加三級年愚弟翁同龢頓首拜書丹  
柴公鹿筵與余少同學於張素文夫子談史論文意甚  
歡洽及長而先後捷秋闈交篤緣深余方倚公爲先達  
知己不意公竟死丁卯之變嗚呼可哀也已越壬申春  
葬公有日期孤桂馨持狀詣余徵銘余少公二歲事公  
如兄深悉公之爲人誼不能以無文辭按狀公姓柴氏  
諱友芝字鹿筵號玉泉世居襄陵縣南京安里京安鎮

曾祖諱莫鄉飲介賓祖諱擢傑太學生貤封奉政大夫  
父諱棲鶴字蓮社廩膳生晉贈奉政大夫才思精敏制  
義宗天崇大家書法道勁規撫晉唐猶精岐黃術人有  
病來求必親爲診視貧不能買藥者施藥以生活之有  
丈夫子三長友蘭字畹香吏員覃恩貤封戶部七品小  
京官晉封奉政大夫三友蕙邑庠生早世次即公也幼  
而聰穎日誦經書盈寸許十歲爲文卽有奇句年十六  
補博士弟子員學使者咸器異之旋由拔萃科應庚戌

朝考奉旨以七品小京官用籤分戶部福建清史司行走是時粵楚方用兵徵糧籌餉部務稱繁劇公已而入未而出勤慎在公寒暑無間又於退食餘假約諸同人結社會課每課藝一出都人士傳錄殆遍咸豐辛亥恩科中順天鄉試副榜知公者咸爲惋惜而公處之泊如也乙卯本省鄉試中式舉人丙辰科聯捷成進士欽點翰林院庶吉士告假回籍余邑官紳請主講龍門書院喜爲後生指畫文章程式月中批改課藝至數百餘首

無不殫心訓示學者至今猶稱柴翰林不置焉庚申會試充內廉收卷官矢公矢慎當時咸稱其能嗣於咸豐十年八月告假措資回藉蒙徐松龕先生保請欽加五品銜專辦山西潞澤平汾等處總團在本縣姑汾書院主講課藝一如在太邑曲沃時丁卯十一月逆匪渡河由吉州竄入余邑古城鎮當與本縣會剿商辦防堵公村京安鎮與古城界連爲襄邑南界門戶逆匪竄襄必由公村經過所帶練勇四十餘名益以本鎮團勇共二

百餘人當與講明大義率衆堵禦古城烏合之賊深知京安有備已於二十九晚間盡數竄南陡於三十日逆匪復率大股北撲公身先壯勇以死抵禦奈衆寡不敵練勇死傷潰散以致力盡被執抗節不屈登時遇害時年方四十有一大吏上聞奉旨贈卹如例初公與余同學論史每談及古之張睢陽顏平原似有慕乎其爲人茲果殺身成仁亦可謂克終厥志者與公短小精悍聲如洪鐘目光如炬一見卽決其非凡又書法秀整適麗

學士大夫得其片紙隻字奉若至寶八股獨抒心得不主故常已造名家之室惜未梓行於世然讀其鄉會諸篇已足見吉光片羽云距生於道光丁亥年十一月十八日吉時德配張氏誥封宜人後公三年而卒年四十有四女一無子公胞兄畹香公次子桂馨爲嗣以公廕

世襲雲騎尉娶吳氏本縣誥封振威將軍果亭公孫女都司虎臣之長女姪三桂衡桂珍桂清皆幼讀茲卜於壬申三月十三日酉時葬公於祖塋左側張宜人附焉

志已且銘曰山林匪卑廊廟匪尊我公講學桃李盈門  
文章節義兼之者少我公矯矯天興奇表被執不屈死  
事著節睢陽之齒常山之舌

松亭吉公暨德配吳宜人德壽碑

邑人韓仰斗撰

竊以禮重引年疇衍九五之福祿典隆尚齒歲紀八千  
之春秋古今來大德之人必得其壽况星輝南極宴啟  
西池如松翁告老先生及太君吳宜人值古稀而同慶  
爲今世所罕覩者乎公世居夏梁村近南泰山卽縣志

萬壽山

印

進壽

字

松亭語云壽比南山不老松以之贈

公名實相符宜以地而壽也公懸弧期當三月二十五  
日醉仙桃宴蟠桃桃華舒豔於斯爲盛宜以時而壽也  
公有子五女二孫四人或術習計然或車徵令伯一門  
濟濟有汾陽遺風宜以人而壽也公家號素封中年遭  
回匪之變古浪生意雖受滋擾而公勤儉倡於前太君  
以敬戒隨於後舊物光復家聲丕振宜以梁之亞而壽  
也且公少習韜鈴擢登黌序清壬寅以剿滅粵匪兩廣

總督岑奏賞五品銜斯公之功德著於國者公宅心中  
正制行寬宏太君紀綱內政威愛皆施諸子女亦相率  
自勵孝友脩至家庭雍雍久爲邑里所則倣又公與太  
君之德播於鄉者功德兼立更天錫純嘏永垂不朽也  
茲際七旬雙壽適值聖朝建元邑侯王縣令循例上請  
並譽以椿萱並茂梁孟古稀疑是絳縣之老人宜荷彤  
廷之盛典鶴飛西來咏謠天上霓裳鳩杖雙扶喜迓日  
邊綸綍等語益見白頭子牙鷹揚奏績黃髮兒齒鶴算

添籌詠壽考偕老之詩鄉人稱觴拜祝

子忝屬猶子不

揣固陋謹撰俚語於瑣珉非惟口碑載道兼祝公與太  
君壽同金石藉表獻曝微忱云

張纂村重修文昌閣議和亭里東門記

余所社東高西下勢若建瓴而前人於是乎閣是閣也  
呈景特奇雨灑平皋雪滿羣山杯酒憑檻處處皆我書  
料詩材而閣外農人相見依依話桑麻殊饒逸趣又祀  
以文昌帝君登斯樓者瞻仰之餘更屬瀟我塵俗不淺

第年久不堪寓目蘇公萬剛偕友武等於民國三年甲寅春以巡田所獲葺而新之復賈其餘於里東門暨議和亭落成問序於余余曰此盛事不可不記且以永我之好也

邑人亢鳴謙撰文

重修留侯祠碑記

李世祐 長安人

嘗讀馬遷班固之書載侯之事綦詳顧以侯始終爲韓稱爲韓人而不書其里居致後之人有以侯嘗游下邳而謂爲下邳人者有以侯封留而謂爲陳留人者紛如

聚訟心竊疑焉迨承乏是邑訪轄境之山川考先賢之遺蹟乃知侯爲邑之東南鄉人村曰張相距城三十里因侯而名也侯裔之散居者曰東張曰西張東張之東有龜山相傳爲侯之修養處山之巔土人掘地得石誌曰漢留侯張良之墓則侯之爲邑人也益信墓後有祠三楹以祠侯自清道光間重修後風雨剝蝕將就頽圯者有年矣今春因災辦工賑邑紳王君等倡議修葺請款二百二十元越月而蕝事囑余爲之記因慨夫秦室

失政豪傑蜂起鹿走中原羣思爭逐其不上而沿爲從  
橫之局亦將下而演成割據之風蓋其時去戰國未遠  
而其人又勢力相若也乃侯以亡匿之人佐一泗上亭  
長不階尺土五載而成一統之業何功之偉且速哉今  
者專制告終請帝退位一秦室之失鹿也南北分裂相  
持靡已一楚漢之爭雄也軍人抗令據地自固兵叛匪擾  
鄰省時聞一餘耳之負嶠而勝廣之篝火狐鳴也然而  
鐵血楮墨馳逐紛紜日求統一而不得者十載於茲矣

豈果天禍中國抑人謀之不臧歟治亂之機互相倚伏  
山川靈秀鬱久當發汾水之白雲無羔龜山之時雪依  
然邑之人其有繼侯而生者余固馨香祝之無亦諸紳  
修祠之意也夫





詩

蒙溪山居

五言古



元張著

我本山中人十年墮紅塵歸來媿青山青山解迎人十  
里如相望五里如相親乃知山德厚不以俗駕嗔藹藹  
桑麻原熙熙雞犬鄰落落冠裳古悠悠言話真面思所  
遊地囂埃塞城闔終焉吾有約為報山之神

憶巢父

明李容邑令

幽壑映晴巒溪水揚新綠言昔有異人而此寄幽獨放

身臨集三 卷之二十四  
情凌漢霄浮雲等黃屋濯足清冷濱長笑響山谷爲憚  
都俞煩甘心友麋鹿聲飛天地間誰能嗣芳躅

咏席師

憶昔陶唐時光岳氣完好生此華封儔結寓山之窈夕  
眠松石雲朝歌羲黃道胡爲擊壤歌薄言瀉懷抱噩噩  
太古風降世誰同調獨憐荒塚頭離離半秋草

張留侯

睠彼韓公子奮起從高皇氣象固儒匹伊呂同輝光今

古稱人傑明哲真非常決策來商隱躡足封齊王功成  
身勇退健羨良弓藏下馬拜高墓古樹明夕陽

張蒙溪

門楹夕照明村墟藹林木蒙溪解組歸曾此易風俗衣  
冠不隨時禮樂教兒讀豈直閨門間里閉仍修睦遺風  
尙凜然後學多私淑弔古拂殘碑歔歔奠醢醢

張承旨

明明太平關山川遠涵映公寔間氣鍾草木亦榮幸有

筆大如椽信史煩刪定鑿坡三十年陰陶多士正操持  
冰霜清氣沮金石勁幾度仰高風式木起深敬

牛叅政

累累數塚青亭亭一碑古殘刻紀芳馨樵牧知光祖英  
英間世才疇能踵遐武寵遇冠時流符佩三珠虎吁嗟  
敗壘邊野花自開吐因感雍門言悵望原頭土

東閣晨望

國朝 崔瀛 邑人

晨起望東山旭日散林木深壑靈風响得爽豁幽獨凭

立虛閣上擬搗雲間屋記曾披道書凌空飛仙築從此  
遠塵氛崖畔留鶴宿

襄陵行

七言古

元王 暉 翰林

暮春庚辰日維丙駕言出遊事耕省西郊微雨半晴陰  
幾點殘雲露山頂馬蹄踏破落紅香飛蓋追隨垂柳影  
晉人熟食三月節店舍無烟竈厨冷春到襄陵滿縣花  
綠陰池館總姚家清樽遠酌會心賞不與鶯燕爭春華  
画輪歸輾故堤沙金店西頭酒更嘉舉杯為憶劉漢事

雲龍風虎何紛拏  
偽淵東開著峻址  
青衣行酒真驚麕  
寧帷一笑雨寂寞  
野老指點宮臺窪  
萋萋迷悲碧荒城  
曲依舊溪流帶北斜

送丁廷玉分教之襄陵

明薛瑄 侍郎

太行之山何崔巍  
鐵崖翠壁萬仞中  
天開其勢北來吾  
不知其幾萬里  
但見橫亘遶磧  
包括秦晉斗起  
中原之地何壯哉  
往年吾嘗陟其頂  
四顧山如培塿  
樹如蒼黃河一線  
遙遙下砥石  
奔流直到東海  
不復迴此時英風

浩然洒六合便欲歷覽天上金銀臺  
其中羊腸九折走峻坂  
摧輪怪石硎礪磊落而成堆  
太行之高且險也如此子  
今遠行令人興難裁  
倘到昔所登覽最高處  
為我歌此一曲還徘徊  
西望襄陵迢迢抵幾驛  
驅車徑須往渡清汾  
隈願子居易思險慎  
厥守始終永保令譽  
慰我相思懷

襄陵分司題壁

司馬堯 御史

嗟予素有林泉癖  
每向林泉情不已  
昔日窮居求志時

結茆直向蘭亭裏蘭亭裏面山最深茂林修竹團蒼陰  
清泉遙向半空瀉雲霧往往生衣襟我時坐卧萬山頂  
心懷直與山俱靜一丸妙趣頗熟拈三代文章會深省  
自從擢第向銜坡回首林泉情幾何紅塵馬前一千尺  
終日碌碌相奔波幽情雅趣固無改却憶故山猿鶴在  
舊學荒蕪日益深宦途宛轉真成海今朝持節出三邊  
覩此清幽心豁然定應神物故相劇移却蘭亭來我前  
陰森竹樹相蒙密隱約亭蘭竹深出寒泉繞屋流白雲

古木回簷礙紅日池蓮後時雖半枯風致未減知章湖  
綠蒲紫荇相映帶秉燭夜看疑畫圖朗吟還向亭中坐  
點點流螢拂衣過秋聲瑟瑟檻邊來木葉蕭蕭燭前墮  
分明如在蘭亭中一腔澄徹萬慮空今朝曉起不忍去  
怕見林梢霞彩紅

和前

顧福部郎

縈懷山水欲成癖奔走泥途猶未已東風使節駐襄陵  
光景分明如夢裏石苔窄逕宛轉深交加綠竹敷棠陰

空青濕翠左右落冥濛沾我征袍襟我身疑作蓬壺頂  
白雲隔斷紅塵靜清風輕向兩腋生伫立無言心自省  
幽亭正倚西城坡登臨如此良辰何好鳥嚶嚶新出谷  
錦鱗荇底翻晴波蒼松期我節勿改老去留得貞名在  
苑紅李白能好看一夕掃地愁如海呼童洗硯臨水邊  
詩成倚劍心茫然丹崖翠壁重疊見恍若屏幃當吾前  
四圍花草更茂密池分一派龍泉出清兮可以濯冠纓  
盤桓不厭留終日太行東望淚欲枯故山直在吾西湖

安得長風驀地起高搏遂我南朝圖拂衣瀟灑起復坐  
階下流光隙駒過陰雲忽向檻外生霎時雨廊簾前墮  
阻我官程雖熱中蒼生被澤非成空羣陰一讓太陽出  
五雲分彩祥光紅

遊娥英泉

范晟

幽泉噴薄蛟龍吼萬斛珠璣牽蒼走波心隊隊錦鱗跳  
驚避釣絲千尺柳等閑探賞須回首尙憶仙娥環佩所  
嗟彼鼉降已多年泉水涓涓如說舊

蛻菴歲晏遺懷

五言律  
三首

張翥

小小新齋閣温温舊甃精神全藉酒助力半支藤蟄  
 豸深坏戶冥鴻巧避矰蒙頭衲被底何異在家僧  
 世路正如棘吾生猶繫匏詩人歌蟋蟀軍士歎螻蛄無  
 地營家食何心解客嘲山林徒在眼難覓一枝巢  
 書舍如僧舍心閒與靜宜寫多髭兔穎藏久艸貂皮宦  
 蹟年勞見生涯日歷知未應同與俊肯負沃洲期

西花園

明邢讓邑人

別墅連城曲幽棲絕點塵雲山常在眼簪紱若爲親籬  
 外饒君子床頭足聖人無邊風景好來往不嫌頻

寄邢祭酒先生

吳文舉

師道尊天下才名重翰林詩書陶士術霖雨濟時心楊  
 柳風吹面梧桐月滿襟何年資講益重聽杏壇琴

省耕十詠

李谷

燕村蔬圃

花村過雨後緩轡試閑行隔葉鶯交轉穿籬菜亂生青



稍存嫩濕紅樹欵新晴欲喚園丁語恐爲林外驚

賈朱麥浪

漠漠平蕪地依依燕麥芑翠添新霽雨浪起晚來風天  
澤元無異息波迥不同安能連萬頃頓使歲時豐

繫灘鏡天

誰滙繫灘水澗澗小鏡天逖涵晴日影倒蘸碧峯巔一  
脈潛通處齊民灌溉田分明清徹底端不是貪泉

印池曉月

可丈方池小漣漪一掬清寒光凝太液曙色薄昆明眼  
底江湖闊夢中春草生黃金誰肘印曉月照斯名

福洞晴春

徑入宋村洞風光不世同烏啼千樹碧花笑滿山紅鐘  
響清蒼外人行圖書中溪流仍泛泛疑與武陵通

市鎮曉集

風晴山市早雲合四民連紅杏墻頭出青旗柳外懸魚  
鹽交易退貨利有無遷自我能平價誰人不受壓

東柴烟柳

城市南頭柳晴烟一抹輕依稀元亮隱想像亞夫營啼  
鳥如遮護離人惜送迎章臺非此是莫起等閒情

西梁雲稼

晴樹藹西梁如雲萬頃黃黍垂秋色重風襲豆花香牧  
笛青山外人家綠水傍扶歸田叟醉桑柘倚斜陽

鄧橋野色

登眺鄧橋上翛然野思長一痕春水綠萬點曉山蒼夾

路花饒笑連天草正芳昔賢遺愛在斯土倍生光

花塢紅香

暖風十里路苑杏色爭姝點綴千機錦粧鋪一畫圖香  
酣蝴蝶夢紅滿蜜蜂鬚未許塵埃近相看隔水區

謁邢先生墓

范 晟

拜謁先生墓苔封有道碑九京人去遠半夜鶴來遲雨  
濕梨花慘風號宰木悲英靈如可見夕陽滿空祠

臺中卽事

劉應熊 御史

蘭署開幽徑叢筠暗曉霜碧流縈檻合翠蓋入簾香湘  
浦空搖落武陵亦杳茫何如城市裏有此白雲鄉

臺中賦竹 二首

黃洪毗 御史

臘月襄陵館持杯對此君高枝斜帶雨密葉細藏雲淇  
澳原同調湘江不染痕夜深風影亂雪裏動龍紋  
眾芳搖落後獨愛歲寒枝勁節憐誰共虛心只自知事  
傳龍化處聲憶鳳來時相對江南景烟蘿起夢思

宴襄陵公署有感 二首

周斯盛 副使

屈指曾遊日於今十五年猶餘溪逕竹似減半池蓮地  
有論文主人非用世賢碧筒還可折拚醉曲欄前  
臺榭水中央微風過雨涼坐宜三伏暑酣任百花香曲  
沼廻龍舸新蒲薦羽觴聞君歌楚調疑是泛瀟湘

過襄陵會社定吾明府

李騰鵬

聞道襄陵好今來勝所傳中山千日酒華嶽一池蓮鼓  
腹民如古鳴琴令是僊此君能愛客清影舞窓前

襄陵臺中叢竹

熊廻

叢竹當軒列天然翠作屏風清金若奏雲繞鳳疑停不  
染三湘色空傳上士醒歲寒堅節操獨伴太微星

藐姑射 二首

翟師偃

共說神人宅相將一再攀龍湫幽澗底仙洞翠微間  
嶂三千丈平泉十二灣登臨興不淺側耳聽潺湲  
郭外招提隱間中載酒看涼風來近岫急水下平灘石  
古千年迥林深六月寒浮生忘去住落日尙盤桓

謁龍澗華神祠

翟師偃

幽壑隱孤峯千秋廟貌崇世傳龍澗澤人誦藥王功  
鳥道青天外蟬聲綠樹中登高暫作賦脉脉領薰風

題異植 並序

國朝 丁宏誨

馮翊敦菴張公宰襄陽一載公之兄登賢書邑人爲  
樹幟久之標端萌生人以為異忽值寇氛逼城公於  
城樓列頸危而復甦意樹其爲公兆坎嗣是樹枝蒼  
蔚邑人愛而護之卜公後必昌大爰賦短章用紀厥  
事

生意婆娑盡春風吹又回孤標同挺節偉幹自成材蔽  
芾留遺愛輪囷老大才鬱葱佳氣繞疑是倚雲栽

遊龍關峪

謝國傑 邑令

高閣諸天近懸崖一線通雨來青嶂外身入翠微中石  
怪疑蹲虎松虬若卧龍登臨今日事把酒挹仙風

龍祠和友韻

陳欲達

天源集萬壑今古遶亭湫氣噴生雲服漸鳴出雨秋泛  
槎欣載酒臨渚喜鷗留倩作山陰勝歸從李杜遊

中夏遊龍祠

郭永豐

姑射之芳洲風清夏亦秋石泉叠迸出溝水遍分流魚  
戲如無水龍藏疑混鯁冷然豪濮意我不異莊周

春日遊龍澗峪

喬汝為

携友尋山徑兒童春半肩莢花紅霧裏柳色碧溪邊坐  
石嘗村酒行歌過水田松風吹未歇策蹇入蒼烟

村居初秋雨過得爽

崔瀛

村居多古色野雨足微涼濕鳥爭林噪歆荷待月粧池

開萍藻影風約水泉香共客懷新爽清吟對素觴

宿東山朝陽洞僧舍 二首

徐之駿

層山橫積翠歇馬遠投林寶界懸崖古禪棲探穴深晚

風消夙暑初月下輕陰坐聽疎鐘發塵囂何處侵

未愜投山意聊觀卓錫綠野花香有色澗水淨無烟聽

鳥高松外尋碑積蘚邊老僧堪一話此會更何年

送襄陵令李君 七言律

宋 歐陽修 學士

綠髮襄陵新長官面顏雖老渥如丹折腰聊為五斗屈

把酒猶能一笑歡紅棗林繁欣歲熟紫檀香軟禦春寒

民淳政簡居多樂無苦思歸欲掛冠

奉寄張蛻菴承旨

元 釋來復

東觀蓬萊紫翠間五雲飛繞佩珊珊宮中夜賜金蓮炬

天上晨趨玉笋班老去乞身思故里間來隨意宿禪閑

茗花溪水春如酒何日誅茅傍碧灣

按察分司壁題

明 蕭 啟 都御史

地位森嚴竹木幽亭池四面引清流畫長風動荷香細

夜靜波搖月影浮  
闌檻生涼消客慮  
軒窗穿綠逼人眸  
巡行何必分南北  
此處原來勝舊遊

和前

趙

欽

按察使

可愛霜臺景物奇  
喬林茂樹綠參差  
森森翠竹遮荒徑  
隱隱寒泉入小池  
風動荷香魚出躍  
月明露冷鶴歸遲  
倚闌獨立心如水  
清意無邊祇自知

和前

顧

福

景出汾江第一奇  
小停西倚堞參差  
雲出澗壑山懸幕

水遶簾櫳地湧池  
碧藻靜涵春雨潤  
畫闌斜隱夕陽遲  
歌臺舞榭成泥土  
此段清風摠不知

和前

黃

著

御史

形勝河東此最奇  
蓬壺仙島若堪差  
春風花氣薰苔徑  
夜雨泉聲漱石池  
碧樹團陰侵几潤  
白雲拖影上闌遲  
天機幻出無邊趣  
賸有幽懷野鶴知

和前

李

咨

誰製西園一段奇  
尋常景物少堪差  
蒼松偃月龍蟠窟

翠竹臨流鳳浴池地面南偏春意早  
墻頭高礙雨聲遲  
公餘幾度頻來往見此清修若故知

題清風亭

趙 歌

芰荷池畔跨橋亭花木交加簇畫屏  
鶴避茶烟棲古樹  
魚吞硯墨動浮萍水連天去無邊  
白竹遶堤來不斷青  
公便駐驄須飽玩重遊焉肯厭勞形

和前

顧 福

十丈塵中見此亭古苔怪石倚雲屏  
春風生意滿階艸  
世路功名一葉萍秋水遶池浮鴨綠  
這山逼漢擁螺青  
幽然自得乾坤趣豈是尋常月露形

和前

黃 著

綵雲堆裏聳孤亭當面湖山擁  
画屏落葉鳥驚風偃樹  
晴波魚躍浪翻萍雨添香艸  
沿階碧烟鎖修篁夾岸青  
暫却紅塵於此憇支願相對竟忘形

宣聖廟釋奠

李 咨

五夜庭燎薄上蒼  
黌宮諸子藹踰踰  
禮遵彝典犧牲脩



神假丹誠俎豆光  
芹藻尚霑洙泗澤  
詩書猶帶杏壇香  
斯文自是應珍重  
萬古綱常賴素王

同前

范晟

盛世尊崇祀素王  
泮池日暖藻芹香  
禮行三獻尊周典  
樂奏咸和應魯堂  
濟濟衣冠聯玉佩  
輝輝燈火雜烟光  
中天奎壁星華燦  
瑞協文明萬載昌

晉橋梅月

李咨

漫傳梅月間時奇  
三載依稀入夢思  
圓處每憑冰鑑影

開時常藉雪霜姿  
謫仙把酒應曾問  
和靖當年亦未知  
惆悵雙清今寂寂  
一竿青旆畫橋西

同前

索 睿  
教諭

幾迴閑賞晉橋邊  
梅月相傳不計年  
每愛冰霜添綽約  
尤宜午夜對嬋娟  
調羹有待何時實  
折桂曾看幾度圓  
更喜飛塵無半點  
清癯風味出天然

同前

范晟

梅在橋頭月在天  
一枝低亞映嬋娟  
梅期月兔知開謝

月約梅花伴缺圓何處暗香消息遠誰家殘照景光偏  
於今冷落雙清趣不見逋仙與謫仙

三嶝雲峯

李谷

嶝嶝山頭更是山嵯峨直入碧霄間華池北去連平水  
姑射南來接故關翠幃着烟濃又淡白雲拖影去仍還  
幾迴畫靜鳴琴後閑擬西山作畫看

卧龍靈應

范晟

崇山西嶠卧龍祠肇自隋唐全盛時岩石棲靈常電達  
珠林聽講有僧知雲生潭影藏蛟窟風遞鐘聲吼葛陂  
歲早爲霖興變化堯封今日賴雍熙

湖山烟雨

索睿

山色湖光靜鏡開行臺佳致勝蓬萊數峯削玉天邊見  
一水通池地底來柳蘸綠波魚散去烟迷青嶂鳥飛迴  
公餘時向高亭飲賸有荷香到酒杯

汾流晚渡

李谷

東郭東頭汾水濱波流縈處是通津櫓聲欸乃驚紅蓼

身臨集志 卷之二十四  
漁火熒煌照白蘋待渡馬嘶楊柳岸扶歸人醉梨花春  
堪憐畫艇夢兒大能濟東西南北人

同前

索 睿

襄陵城郭枕汾流落日行人喧渡頭疎柳遙連關外市  
澄波倒浸岸邊樓櫓聲嘔軋斜陽晚漁笛淒清遠浦秋  
南去北來無限客濟川獨賴一扁舟

同前

范 晟

長流滾滾鴨頭新路隔東西扼要津紅蓼綴灘霞散錦

白蘋觸岸浪翻銀夕陽林杪催行急水鳥沙頭喚渡頻  
閑聽棹歌聲欸乃滄浪一曲濯纓塵

巢溪春漲

李 咨

殘雪初消北岸晴巢溪曉漲擬橋平驅牛事已湮陳蹟  
洗耳人猶擅舊名草色遙連春漾漾柳條低拂綠盈盈  
誰知一綫清風遠千載桐江釣子陵

同前

索 睿

泛泛春溪漾碧漪當年巢父此棲遲荒祠遺像今猶在

清節高風世共推  
柳帶和風青裊裊  
岸痕新漲綠差差  
我來欲把塵纓濯  
却恐仙靈亦見疑

同前

范晟

洗耳曾聞耻飲牛  
問人消息屬巢由  
三交雲液莠花淺  
百尺烟光柳帶柔  
高樹烏啼猶識姓  
古祠鹿過亦回頭  
春風北岸添新漲  
一脈清清依舊流

飛虹雨霽

李咨

迤邐長橋擬螭螭  
往來人在画圖中  
夕陽半落橫清澗

宿雨初收挿碧空  
題柱固難司馬氏  
乘輿已陋鄭人功  
何須驅石到東海  
天下車書正會同

同前

索睿

長橋跨澗勢穹窿  
雨霽雲衢卧彩虹  
華表遙看殘照裏  
雕闌斜倚半天中  
雄臨晉地山河險  
密邇秦關客旅通  
役役紅塵經過者  
誰能不仰濟川功

同前

范晟

公輸巧構枕高寒  
雨過虹飛壓澗干  
鳥向日邊翻霽色

人從空裏倚晴闌  
銀河漫說津曾問  
烏鵲空傳羽未乾  
獨有昇仙題柱客  
歸來車馬自長安

龜山晴雪

李 咨

雪霽東山渾似畫  
幾迴徙倚闌  
看犬牙排玉三峯冷  
龜甲凝銀數點寒  
瑞氣鬱蔥塵世杳  
晴光燦爛海天寬  
小樓添得無邊趣  
多少瓊瑤落筆端

同前

范 晟

岩堯一帶擬龜形  
雪甲嶙峋拔地靈  
巉岫幾層排玉戟  
斷崖十里聳銀屏  
林間野鶴閑清夢  
磧下寒梅散遠馨  
紅日曉從天外出  
分開數點雪中青

雲亭環翠

索 膺

侵曉池頭宿雨收  
翠雲晴護小亭幽  
夜加淇水千竿玉  
彷彿瀟湘一片秋  
座上好風來面面  
吟邊清興自悠悠  
宦遊獨有霜臺客  
佳句琅然任唱酬

平水拖藍

李 咨

溪上巉嵒列画屏  
溪間流水玉崢嶸  
堯封溝澮猶天造

禹蹟山川仰地平豐稼擬雲秋色重  
踈林過雨晚涼輕  
何如萬派皆澄徹唯有源頭一脈清

同前

索 膚

源泉混混出雲根  
絡石穿林絕點塵  
十里翠鋪湘簟靜  
一灣綠染綺羅新  
荒烟野渡隋堤景  
芳艸汀洲洛浦春  
苑屋幾家臨水住  
朴淳猶是古堯民

退菴別業

邢 讓

卜築西垣最可人  
青山爲屋水爲鄰  
身將隱矣文何用

人不知之味更真  
自古交游少同志  
到頭聲利不關身  
清泉便可如澠酒  
澆盡胸中累劫塵

省耕宿釋迦寺

李 咨

青崖絕處古招提  
棟宇猶傳至正時  
仆草斷碑苔蝕字  
摩空老樹鶴巢枝  
蒲團寂寂僧歸定  
竹院蕭蕭月上遲  
一夜虛堂清不寐  
滿懷民瘼有誰知

九日姑射山登高

李 咨

三年山右逢重九  
每度佳辰興未休  
綠醕似憐遊宦客

黃花猶戀少年頭風流自許追元亮知遇誰能繼馬周  
登眺有懷歸路晚滿林紅葉不勝秋

承恩寺集古

邢訓 邑人

門外春橋漾碧波

馬伯膺

萬家烟火夕陽多

趙子昂青

山盡是朱旂繞

王摩詰

寶地曾經翠輦過

陸天錫上國

幾年倍賜履

張仲舉

海門何處問魚簑

王熙

論心得住

慈雲閣

趙學士

願及昌時養太和

范德机

清音亭

雷復

棟莠相輝覽勝遊停驂偏愛水亭幽林花紅落三春雨  
池藻凉生六月秋遠岫淡烟浮罨画断橋流水雜歌謳  
太平樂事真難遇試問瀛洲有此不

遊姑射山

黃克纘

平泉西下白雲天流盡韶華不計年餘歷已膏唐地外  
愁聲故落言宮前濯纓清對人如玉紉佩香傳澗有荃  
更想歌風汾水曲中流直欲泛樓船

姑射龍神祠

黃洪毗

仙人姑射御神龍噴出寒泉晝夜同殊勝中濡誇絕品  
 平分二邑誦元功雷聲遠聽渾疑雨雲氣長噓不待風  
 古廟斷碑深樹裏莫將伏臘負村翁

趙曲懷古

李元齡

搔首浮雲晉地深名山一望負登臨秋風似帶韓王氣  
 白日疑懸趙朔心墟里人烟汾水渺樓頭星象太行陰  
 我來懷古情無極澹澹斜暉起暮砧

望曉樓成秋日登臨

陳勗 邑令

重上層樓御遠風雲連齊晉度飛鴻喜瞻灑氣文星爛  
 慶洽蒼穹湛露豐東臨汾浦疑銀漢西列姑射幃碧空  
 興來把酒歌明月遙接清光萬里同

登鎮汾樓

翟師偃

直上高樓思渺茫擬憑黃鶴任翱翔眼空禹服三千闕  
 笑指秦關百二長劃地風雷壯異北彌天日月照河陽  
 當年虞夏滔風在翹首令人憶帝鄉

暮春登東山

翟師有



星齋蠹兀俯干畦春服遊人逐馬驪嬈嬈金爐香霧礪  
芄芄紫陌柳烟迷苾芻老衲禪無障肥碩高標仙有梯  
我亦欲來尋侶伴山靈肯許下招攜

視蹉重遊賦懷

國朝

胡秉忠

擒昌筮仕幾更秋今日巡臨亦舊遊騎竹兒童連紫陌  
攀轅父老盡頽頭花封愧比古遺愛柱史依然昔牧侯  
暫浣征塵剛信宿吟懷聊寄署中留

異植

序見五言律

郭永豐

高標特立莞生枝掩映孤忠戕復孽錯節蟠根形岌業  
吸精飲瀼勢參差千春紀歲應同遠八桂成林未足奇  
最是當年深惠愛依依垂蔭繫人思

同題

吳世爵

陰陰樹影滿河陽粹後榮生更自芳續命瓊田聞異草  
返魂姑射見靈香惠風秀發萊公栢麗日光浮召伯棠  
已卜留傳千載下蒼髯擁戴應同長

同題

趙昌運

襄陽縣志 卷之二十四  
獨立昂然倚碧霄不因多難遽殘凋心堅北闕喬松質  
血濺南樓湘竹標盈野春風琴謾謾凌空皎影鶴脩脩  
論功誰是持平者大樹無言名自昭

同題

喬運閔

旌標底事忽生繁貞幹由來世所存百里安絃猶徧野  
十年嘉樹已蟠根綽兮陶柳清風肅渥矣劬膏惠日溫  
節義於今終不泯兒童歌舞自晨昏

同題

趙鴻運

惠聲自昔推分陝不謂甘棠此樹同已向憇時早見德  
却從剝後更標忠清光密覆平泉上瑞色長留姑射中  
爲祝軾熊臨賁日瞻依道左拜仁風

咏異植和趙叔漸韻

崔瀛

曾聞古樾色龍葱榮發旌干翠蓋同原向蟾宮分異種  
堪依楓陛表孤忠遍飛雨露千家裏上接雲霞一望中  
還憶當年誰栽植只今葉葉舞春風

凌雲塔告成

謝國傑

浮圖巖嶮枕河流佳氣蒼茫射斗牛影入波濤龍欲舞  
勢分霄漢鳳來遊窈窕虛日麗千山碧簷角風清六月秋  
願得朱題同雁塔樵川姓氏共悠悠

前題

吳世爵

層圖矗起飲汾流橫鎖如杠上下浮四面山光環翠壁  
一灣水澗隱青蟻憑高上薄天樞近擷秀深涵地脈悠  
從此文章傳相筆千年淑氣載神州

前題

喬運閔

亭亭層構倚雲端四野烟光眼底看儼若天闕撐玉柱  
疑同仙掌擎金盤晴嵐拱揖霞爲幃平水滌洄錦作闌  
此日身登千尺上紫微近傍聽鳴鸞

前題

張元聲

巍建削成歲月勤屹然一柱應星文盤回回互通佳氣  
芻芻層層拂霽雲蒲縣莖花烟裏見夾堤楊柳水中分  
運斤獨藉神君力卓矣清風未可倫

前題

趙鴻運

凌空寶構勢嵯峨壁立汾干瑞氣多萬壑烟雲象外出  
千層濤浪眼中過團團華蓋承仙露匝匝簷鈴雜佩珂  
自此近天特尺五非閑靈鷲禮維摩

前題

喬運闓

塔影臨流挿碧空經營幾度策花驄仰瞻奎宿窻窻近  
俯聽濤聲一戶一戶通地氣龍旋標玉樹人文鵲起列珠宮  
高頭多少題名字誰不咏歌茂宰功

前題

席嘉賓

塢勢巍巍汾水東登臨身在碧虛中雲間鶴影翩躚下  
望裏瞻宮咫尺通揮筆文章連斗象舒懷衣袖滿天風  
當年王粲豪吟處可似層層倚太空

前題

王升秀

扶翠遥遥接碧空轟然亭峙鬱葱龍山光盡日明朱檻  
水勢因風動寶鈴飛鳥翺翔時上下落霞明滅乍青紅  
洞開八面文星燦欲步雲衢此即通

雨罷晚渡汾河

崔瀛

雨過殘虹射怒波船頭猶掛雨時簑行人喚渡舵聲急  
飛鳥依城暮色多烟樹紛迷籠碧草雲山遙望點青螺  
長風波浪都閑事且卧中流發棹歌

按察解中銀杏

郭永豐

疇昔誰敷惠澤深頓令勿剪到於今都將珍品埒文杏  
羸得芳名喚白金挺翠獨當花滿縣生幽全軼桂成林  
無由可把清貧療摘爾盈筐慰我心

題晉橋通閣

郭永豐

扶梁復覩舊臺方想象梅花共月斜一帶雲山簇屋舍  
數行烟柳茂桑麻農人雨驟無煩笠役客日曛好駐車  
不似六橋歌舞地相將詩酒競繁華

晉橋通閣成

趙鴻運

曠載經營此日成霓虹一縷入山城人遵帝道行來爽  
水自仙源流出清岸柳將疎樓市接郭田欲斷塢烟生  
濟川有志丹楹在常與梅花伴月明

晉橋梅月

徐之駿

畫橋雄峙接岩城屏霍門前古道橫  
牧笛遠過芳草滑酒帘斜颺綠波明  
千秋梅月仙留影三晉雲山客計程  
溪水東流無限好長安北望不勝情

三嶺雲峰

萬樹宜興人

西南尤美是林巒謝屐初過得大觀  
漸入雲霞人不見已無冰雪晝長寒  
方從狼尾三盤上更列龍腰九曲看  
此地由來有真宅青泥應可當晨餐

卧龍靈應

侯文燦無錫人

探竒歷歷徧堯封喜到崇山最上峰  
古廟宿雲千仞栢晴郊飛雨六朝龍  
結茅豈有隆中隱叩石時來圮下踪  
野鳥似將靈勝處啾啾詳說與遊筇

汾流晚渡

侯文耀無錫人

靜渠山足古汾源流向秦皇駐蹕村  
迤照樓臺花映水落霞城郭柳侵門  
蛩竦橋影經春卧舴艋篙聲入夏喧  
山簡正來携酒處小鮮剛喜上漁綸

巢溪春漲

徐之駿

石隱祠宜矮屋檐檐前流水正漸漸猶憶兩耳紅塵在  
更遣三春碧浪添北岸靡蕪淹軟翠東風楊柳蘸香尖  
無心却愛村童牧清濁相忘飲不嫌

飛虹雨霽

萬樹

莓苔拂讀古碑豐爲記輿梁利涉功遠礪爭流鳴宿雨  
深林高靄跨晴虹樓懸星斗雙崖峻路入燕秦萬里通  
呼應提携人不絕夕陽芳草畫圖中

龜山晴雪

侯文燦

石紋如織草茵香雪後還宜早旭光古樹綴花成庾嶺  
亂烟浮石作崑岡棋枰錯落諸村映衣帶迴環一水長  
試倚危闌看曉色白龜疑出預且囊

平水拖藍

徐之駿

藐姑神境曳平坡仙液鍾靈孕碧波龍卵一祠探穴古  
蜂房諸洞濬流多從汾入海三千里分邑滋田十二河  
蓼嶼鳧汀堪載酒嘈嘈鳴瀑和清歌

龍澗雙闕

萬樹

蜿蜒深入傍山椒忽見仙居出絳霄  
陡嶂劈分成貝闕危崖飛接亘銀橋  
空中樓閣清陰迥物外烟霞俗慮消  
紅袖青衫相映好陀郎祠下馬嘶驕

十里荷香

侯文耀

南陌香塵一徑斜薰風楊柳壓堤沙  
越羅平繞千畦水蜀錦橫鋪十里花  
遊女踏歌分皓月歸人鳴騎出丹霞  
幾將湖上屯田曲吟向沿村賣酒家

莫春遊龍池卽席分韻得泉字

萬樹

平山石齒吐平泉龍子祠前碧可憐  
一勺遠浮十里浪雙流分潤兩河田  
聲隨琴調經堂下清入茶香到枕邊  
夾岸落紅迎客騎此中真有藐姑仙

分韻得流字

徐之駿

古署槐根枕碧流時將清籟入層樓  
西來壺口重巖孕東下汾河萬里浮  
謾說登臨宜杖屨喜分膏澤爲田疇  
籃輿過處聞鳴珮疑是春風帝女遊

分韻得溪字

侯文燦



襄陽縣志 卷之二十四  
泉聲百折向城西直下堯民洗耳溪古洞尋源叩蛟蜃  
危橋飛瀑散鳧鷖一川蒲芷香浮石四野桑麻翠遶畦  
白墮緩傾歸欲暮喜從花下聽銅鞮

飲鎮汾閣

萬樹

城俯汾河帶水長城邊高閣倚河梁西來爽氣迎姑射  
東去晴霞捲太行出浦浮魚花正落隔畦飛雉麥初黃  
使君饒有登臨興爲愛農歌起夕陽

和陽羨萬紅友韻

徐之駿

層樓望曉日舒長南浦雲生入畫梁花柳山川相掩映  
桑麻村郭更聯行褰帷問俗風猶素載酒登高月又黃  
聽唱江南竹枝曲頓令歸思到東陽

和前

侯文燦

吏隱能兼雅興長鄒枚賓從媿遊梁日斜麥隴烏犍隊  
雨歇蘆洲白鷺行民俗懽乘春色麗客程愁見晚塵黃  
仲宣更自懷京國望眼隨風過岳陽

和前

趙良玉 教諭

襄陽縣志 卷之二十四  
凌虛攬勝意何長  
宴比橫汾句栢梁  
官况但須看逝水  
民風還試望周行  
亭臺幾處垂楊碧  
烟火千家落日黃  
不上斯樓一憑眺  
那知春色在河陽

和前

鄭王牧

訓導

三載堯封惠澤長  
公餘登陟望津梁  
濤聲近接知龍沫  
嵐勢廻翔似鴈行  
樹繞劉淵城下綠  
雲歸許褚堡前黃  
政成薰阜宜行樂  
豈但風流說孟陽

重建屏霍樓

喬運閻

危閣凌空俯眎壕  
凭欄遙仰北辰高  
姑山夕照霞堪畫  
汾水掉歌聲作濤  
眺望雅談三古事  
登臨雄弔二陵豪  
偉功此日誰成者  
太史彤廷奏鳳毛

村居

五言絕句

張著

危橋入孤村  
老木倚絕壁  
幽鳥啼一聲  
萬象動寒碧

山禽

邢讓

芳樹豈不愛  
懷彼金丸懼  
何如此幽林  
閒來又閒去

雜咏書分司壁

二首

沈鍾

我別池亭去重來閱二年頭顱真老矣風景只依然  
茲軒偶登臨湖山憑一覽達人更大觀乾坤落雙眼  
過襄陵懷徐令萬之

張四教

我過襄陵道感君去後思藐姑蒼蘚處誰復為題詩  
過三交水吟泉邊鳥

張 鉞

泉琴發幽響立鳥如解音遊展亂其聽飛逐野雲深  
過山居

李 容

一聲兩聲雞犬十里五里人烟矮屋低垂綠樹斷墻斜

補青山

襄陵城北溪坐 七言絕句

宋 張 宇

楊柳陰陰水氣涼椒花蕪蕪野風香地偏愈覺似閑整  
始信擒昌化日長

龍澗峪天橋

元 趙孟頫

天門高處兩仙橋縹緲白雲手可招坐飲漸醺毛骨爽  
翩翩鶴下羽翛翛

清音亭

張 昌

四面嵐霏簇綺筵雙渠流水響涓涓清音亭上春無際  
且放滄浪入管絃

過晉橋

張 鷟 御史

記得當年賣酒家壁間明月照梅花於今泯滅無消息  
獨有長橋對落霞

丹朱泉

張 鷟

太阿拔處卽隨流一脈源源不斷頭孰謂丹朱非聖子  
至今遺惠在田疇

坐清風亭口號

魏東山 都御史

密竹春深掩碧流風光渾似楚湘秋獨憐過此亭中客  
不是偷閒汗漫遊

題大尖山

李 潛 太平令

雨過東山翠欲流平陽雄鎮幾千秋羣山遠近知多少  
仰止誰能出一頭

和前

李 容

一帶名山下枕流懸崖峭壁倚清秋東南遠眺高無際

唯有青天在上頭

襄陵行春

李容

只恐殘紅落亂紛長吟驚破睡鶯魂春光何處堪舒目  
花柳汾川岸上村

龜山謁留侯墓

孫仁

隱隱龜山最上頭佳城云是漢留侯當時輔佐興王業  
帷幄從容任運籌

伯道古居

李韞

零落村墟伯道居高名千載晉尚書依稀遺愛橋邊柳  
却訝當時繫子初

天真觀銀杏

邢訓

實白如銀滿樹香亭亭植向老君堂仙家只說蟠桃好  
難及珍名占果王

春日遊巢溪

范晟

巢溪春暖等閒過鯉鯉晴翻洗耳波漫想驅牛人去遠  
岸頭荒草野花多

襄陵分司 三首

韓邦奇 尙書

汾水春深落晚霞沿堤十里盡莼花  
画船箫鼓遊人醉漫說風流是杜家

薰風綠沼碧荷香玳筵歌兒舞袖長  
一醉襄陵傾百盞不知風景是平陽

姑射泉邊萬竹稠清風樓外四山秋  
重陽醉後歸來晚黃菊紛紛揮滿頭

題留耕亭卷 二首

邢讓

方寸良田遺後人仁耕義耨可終身  
不須歲歲占風雨管取豐登過四鄰

白玉黃金謾作堆他年徒爲子孫危  
遺安有道春常在惟有襄陽老父知

謁巢田祠

何思 都御史

千年洗耳今還在草木淒涼萬古悲  
指點清風何處是鷄鳴山下對殘暉

謁龍祠

王諍 御史

姑射山下亭子幽百泉滾滾捲澄秋不須急向河汾去  
聞說前頭是濁流

登鎮汾閣

曾舜漁 御史

巍巍傑閣倚晴空壁立汾干地勢雄登臨若對南樓月  
千頃汪洋碧落中

別我咏

國朝 喬堯仁 我眉令

皇恩特許返家鄉拜別三我檢舊裝莫訝寒官無一物  
山山水水滿奚囊

過晉橋訪梅月酒樓

崔瀛

仙客當年貰酒家月明疑照舊梅花橋邊問有誰重醉  
只見青帘影半斜

題晉橋

喬運閔

接城幾武石橋拖一道長虹跨碧波樓市疑從海上見  
輪蹄宛在画中過

題凌雲塔

陳欲達

彩筆文涵紫氣浮幾層高擬遏雲流亭亭玉立詩中画

不羨元龍百尺樓

續增詩

藐姑射山

五言古  
六首

毛

達

司李

日出霍峰頭彩雲蟠其下光暉映城隅藐姑相照射恍

惚見仙人玉顏殊瀟灑醉倚白鹿肩縱橫同騎馬

十載訪丹邱夢魂殊勞瘁不意藐姑山相呼入坐睡仙

人逐日來微言授天吏無妨筆如刀但寫活人字

姑山臨汾河綿疊數百里其間冰雪姿居處無定止條

見山之陽相招隔秋水心容永潔清願言余與爾

襄陵有平泉出自姑射麓幽房結其巔疑卽雲霞屋羨

人從中來芬芳散林木呼我臨清流攜手照心曲

姑射產群芳琪花及瑤草仙家棄如蒿何必費尋討世

人事服食安保顏色好笑示不死方教余却醜老

或言汾西縣舊有藐姑里土人邈難求至今遺銅屐著

之如輕綿可以涉雲水延伫待雙鳧朝暮常徒倚

遊龍子祠步毛刑尊韻

三首

喬瑞圖



沿溪入勝地彷彿堯源里處處足怡情随心任行止誰  
比詩人骨惟此清溪水把酒獨謳吟聊復應爾爾  
乘興便登山莫問我僕瘁搜盡幽險跡臨流且長睡詩  
愧青蓮人情同彭澤吏欲覓藐姑仙示我蝌蚪字  
何時遠塵囂結廬山之麓潺潺水繞座片片雲覆屋乳  
燕掠新泥黃鶯鳴古木洗盡秕糠腸好譜流水曲

同前

張 卯

鬱哉藐姑山平泉出其下泉流亂縱橫珠沫相噴瀉人  
耳聲淙淙此境殊瀟灑曠然怡我神貪看時駐馬  
比郭有奧區距城十餘里蜿蜒當翠微仙人舊栖止百  
道入汾襄相傳是德水倘無灌溉功清泚徒爲耳

龍子昔有祠卜築山之麓巋然古靈光支撐破板屋曲  
沼潛脩鱗棲鴉噪神木流水高山間聊以寄心曲  
美人懷西方淫哇嗤北里倘遇安期生形骸若敝屣空  
谷來足音心清卽止水日暮憺忘歸臨風重徙倚

趙邑侯剔除換倉積弊賦歌

張 卯

盛代仁民規奉行恒爲市吁嗟預備倉一年一換易官  
不暇親臨大爲侵漁利出入歛散間青苗害不啻粒瀆  
顆顆負色不許有二旣驗入風車一半還拋棄然後斗  
斛量淋漓故滿地收注無定期交者爭委贄嗟彼遠鄉  
民負戴竭蹶至留難宿客房所納不抵費米代旣無由  
銀折難明致宛轉與吏謀且喜得指示瓜分肥私囊所  
求務愜意火耨與水耕辛苦意誰爲惟我趙父母不將  
耳目寄盤查懸冰壺何處容魑魅近者旣不憂遠者亦

無滯從此升斗餘皆拜神君賜

地震述

丙子暮春  
七言古

李宏柱

平陽地震臨襄洪浮四邑較重臨襄又甚城郭房舍存  
無二三居人死傷十有七八更可慘者斯時之烈火燒  
天黑水湧地厥後之夏田騰烟秋陌浮蛙傷殘餘生何  
克堪此辛總鎮毛公來鳳郡守王公輔同心合德保衛  
民生而億兆再蘇皆二公之賜也聊撰此歌

乙亥四月之六日銀蟾西轉夜入戌長天無翳野無風

萬戶光涵萬籟寂颯然有聲來向乾星月無光玉宇黑  
豈知地裂與山崩但覺怒濤迅雷逼衝沙月石竄若飛  
僵卧街心魂已失醒來却把我弟手兩兩驚詢語共澁  
相持相扶覓萱親高低舊路杳難覓倚天臺榭忽倒眠  
當路却見青山立行行相呼不相聞吞聲帶咽緣竇入  
母幸無恙家人全負母携兒循竇出脚下如沸復如鼓  
時去時來不肯息母子相逢死亦歡席地團團相抱泣  
叢叢燎火若亂烽乍暗還明光灿灿斷脛折臂已非人

帶血披髮真虎域綿綿昏夜不知曉恰如是月無初七  
東方漸高日色紅繪出愁城與愁國房舍人民僅半存  
傷殘橫倒殊堪惻旋聞蒲縣盡罹災又說洪浮臨三邑  
車走雷轟無了休城狐社鼠還相賊太守能仁總戎賢  
飛章告請如羽急 天子披讀淚交流溫語重重垂軫  
恤百萬金粟遍死生成若夏苗時雨浥億兆終戴聖人  
恩至今猶頌太守德

卧龍山覽勝

喬瑞圖

襄陽縣志 卷之三十四  
三  
太行之奇亦何極遊人對之常嘆息分巔更有卧龍山  
叠嶂翠浮千重色我乘孤蹇探名踪山路曲曲白雲封  
瞬息峰迴路亦轉千丈絕壁掛長松攀松踏遍山之徑  
展齒雲霞足逸興冷然石室寒風吹滿耳天籟時相應  
尋幽還陟卧龍祠貝闕珠宮山外峙河東阡陌賴其靈  
萬古千秋常爾爾爲問卧龍卧幾年何時燒尾上碧天  
須臾霹靂空中起片雲倏爾彌大千覽盡名踪聊徙倚  
欲發狂歌又復止惟恐泓下有龍吟驚斷高山共流水

襄陵署中堂之西隅有古栢一株名曰異植因成一

律五言

趙懋本  
邑令

誰人植斯栢歷送去來官勁節同春茂堅心耐歲寒樹  
高塵自遠幹老蔭恒寬好具忝天眼青青着意看

咏異植

孤幹凜標日誰人識異姿堅貞原不昧生發自然施西  
域香猶幻秦封事涉私庭前空獨立霜雪耐多時

汾河晚渡

詩

兩岍人喧渡輕帆去復旋水平春漲雨柳拂暮雲天伊  
軋波心穩微茫漁火連試看行役者多爲利名牽

過鄧中丞故里

賸有孤村在高風自不泯棄兒存古道遺妾見天真麥  
飯今誰供思君一愴神嗟嗟爭繼者何事輒生嗔

龍子祠

仙姬乘鹿去龍子鎮平泉阡陌承波遠臨襄受澤先旱  
澇無足慮禋祀秉心虔靈爽昭民物長歌大有年

夏旱

旱魃何肆虐憂心若轉輪不堪淚作雨愁見地生塵有  
罪宜誅我無私莫病民悚惶虔致禱望澤勝如珍

喜雨

好雨從何至懽聲風送來枯苗今日潤愁眼一時開洗  
出郊原綠滌除旱魃災望霓心已慰含鼓樂春臺

和趙明府喜雨韻

盧秉純

塵笑元規去霖疑傳說來土膏從此潤天眼爲誰開二

語神如聽三農夏不災宰官身可現汾上雨花臺

和趙明府憂旱原韻

張 邠

連宵觀畢宿竟不離冰輪多少田間淚難清地上塵歛

歐勞 令尹鳩鵠看黎民從此豐年穀人人應惜珍

和前

盧敬丹

欲效桑林禱何人催雨輪無行不引鑑有步早清塵共  
信爲霖手頻援顛地民天心如感格點滴亦皆珍

同前

喬瑞圖

四野成焦土三農苦火輪祈垂銀漢水早潤陌頭塵造  
福賴明牧回天起瘠民滂沱應有慶不使雨如珍

同前

柴惟馨

勤勞燮理手欲轉阿香輪願望一天雨滌除四野塵方  
知官似父實念子爲民但鑒誠求意堯封慶力珍

同前

柴友逋

神君虔步躄膏澤不濡輪愁見野無雨堪嗟釜有塵如  
焚憂漢吏靡子念周民願挽銀河水傾盆滿地珍

同前

張恂

甘霖何日降百計似迴輪步乞金龍澤欲清姑射塵陳  
詞籲上帝裂趾痛吾民料應回天意蕭蕭注碎珍

和趙明府喜雨韻

柴惟馨

誠格天心轉知時好雨來枯苗千畝綠愁眼萬家開賴  
此桑林禱免歌雲漢災盈室今有慶頌祝繞琴臺

擬登望曉樓聽鶯

李宏柱

何處鶯聲好春歸望曉樓海霞紅靄靄堤柳碧依依並

坐清堪妬交鳴韻莫傳願言同勝侶斗酒日追遊

趙明府重葺學宮

盧敬丹

文運宏開日克肩人所難六經天不夜一鏡水澄寒  
浴看魚躍摩雲驚鳳搏神龕無卧磔多土壯殊觀

遊高中節公墓

喬瑞圖

浩氣橫丹闕忠魂散碧天聞風常仰止式墓獨留連  
斷石藏狐兔荒松啼杜鵑綠溪流不盡血淚尙依然

龍澗雙闕

柴友逋

曲折藏深秀高低入畫圖虹橋臨壑迥虬樹拂雲孤寺  
古松全老碑殘字半無憑誰問往事把酒自踟躕

登山嶺寺 五言排律

張默

山嶺名勝寺高迥薄雲巔徑絕人蹤罕苔肥獸印鮮峰  
平姑射藐嶺復太行連謾謾風濤冷稜稜塙影圓蟲絲  
罅殿角蔓草沒堦筵飛閣疑無地丹崖別有天虬形蒼  
檜古鶴髮老僧顛登陟諸緣盡逃虛愛學禪

聖壽寺龍爪槐 七言律

澹圃徐亮 山陰人

古樹何名說是槐虬枝盤曲覆蒼苔可能奮臂擎風雨  
且欲擎拳鬪竹梅華蓋當庭真色相袈裟拂眼認靈臺  
卧龍未耀先舒爪佗聽春風動地雷

庚辰暮春同朱子範二尹高幹臣廣文春郊勸農

惲東生 邑令

政拙山城念省耕敢辭櫛沐戴星行沾塗自是田家苦  
供億何煩小吏迎但使三時無曠業從教半綰有餘榮  
豚蹄斗酒非餘願願慰窮簷望歲情



和

高尚志 廣文

清齋昔宿代躬耕得伴仙鳧取次行待哺兒童籬外望  
荷鋤野老馬前迎惠風吹處鶯花繞好雨足時草木榮  
謾道使君饒逸興閭閻疾苦本關情

媧皇泉三次步禱甘霖輒降皆帶雨而歸敬占一律

以誌 神麻

趙懋本

為民步禱出城東齋潔身心謁上宮屢籲惟求誅旱魃  
頻邀垂鑒遣靈霞雲從石起曾經煉雨向泉生自不窮

感德那知歸路滑但聞野老說年豐

壬子入夏苦旱予於閏月二十三日步禱之後因公

赴郡歸至中途遇雨如注誠大快事也口占一律

誌喜

今日因公赴郡城歸來載得雨如傾陰雲匝野溪聲急  
汾渡舟橫沙岸平愁病頓除忻有歲士民相慶地堪耕  
輿中不覺衣巾濕喜聽班鳩逐婦鳴

閏月廿三得雨之後廿五夜又雨民方憂旱連得甘

霖靜聽之下喜而不寐因作聽雨一律坐以待旦  
 前日輿中聽雨聲今宵夢裏更分明瀟瀟響溢簷流急  
 滴滴音隨夜柝清入耳便生涼滿席成渠遮莫澹皆盈  
 披襟坐待晨鐘後先向郊原課耨耕

平泉亭讌飲

皆暮春三月  
二首

失名

平泉百尺出山窩直繞清音亭上過席地綠茵凝宿雨  
 參天奇樹映清波笙歌咽處間雲靜盃斝浮來逸興多  
 追憶蘭亭脩禊事臨流幾欲醉婆娑

清音亭上且凭欄  
 一泓碧浪響漫漫平泉直向山根出奇樹疑從月窟看  
 况是春濃花艷日飛觴莫吝酒盃寬

地震後歸里入邑城有感

程維藩

遼鶴歸來一境空  
 遼鶴歸來一境空滄桑變易話東風廬依瓦礫人烟少  
 路夾蓬蒿野徑通燕雀何從尋舊壘雞犬無處認新豐  
 不堪聚首憶前跡如錦襄城似夢中

詠鎮汾樓呈惲明府

張大聲

百尺高樓嘆壯觀，  
憑高四望海天寬。  
蛟龍隱約浮欄出，  
星月光茫倚檻看。  
萬樹柳烟籠画壁，  
千頃荷葢映雕闌。  
物閒心靜渾無事，  
好整琴絃閣上彈。

和趙明府聽雨韻

盧秉純

夜窻聞打綠蕉聲，  
笑拂衣香坐到明。  
簷上溜來琴可譜，  
庭前唳處鶴偏清。  
稼雲影芄芄滿筆，  
想波紋細細盈。  
曉起更煩靈雨駕，  
柳陰泊裏勸深耕。

同前

雨濕譙樓咽鼓聲，  
琴堂人聽最分明。  
詩中雲漢愁如洗，  
夢裏華胥境亦清。  
柳帶定拖朱檻遠，  
荷珠擬跳錦塘盈。  
自憐廿載甘龍卧，  
未有南陽地可耕。

晉橋梅月

大抵仙人半酒徒，  
醉中閑採藥葫蘆。  
傾來月影花千朶，  
幻出天香水一區。  
奕世尙酣風味好，  
片言莫笑土人愚。  
墨猪只合耽糟粕，  
縱有金丹飽得無。

平水拖藍

石齒泉甘土盡肥龍池沫濺樹林飛尋來碧落爲藍本  
滴出青山是翠微水鳥一拳明雪影酒旗十里颺春暉  
蕭公堤上從容望九曲真如玉帶圍

龍澗雙關

石凹隱隱帶龍腥望處西南列画屏曉日映爲雙關紫  
春山括人一囊青刀圭不盡雲霞氣亭毒仍流草木形  
券在爐中知也未陀郎祠宇至今靈

卧龍靈應

知在仙經幾洞天神龍長此抱珠眠籐陰翠染深深月  
石竇香流細細泉東野書廻雲欲動南陽人去夢相牽  
乘時却爲蒼生起蕭鼓聲高報有年

三燈雲峰

石級層層到碧空飄然襟袖冷然風霏微烟雨三天上  
傲睨河山一氣中絕嶝懸來雲影斷古碑卧處土化融  
倘携謝眺驚人句呼吸真堪帝座通

飛虹雨霽

美阿縣志 卷之二十四  
三  
橋名奇幻竟如斯四字源流村牧之雁齒排成空外望  
鼉梁駕入画中詩神斤鬼斧高懸處海水天風下聽時  
虛步都能歸實際公般元妙幾人知

汾流晚渡

草平沙軟路西東舟子招招去不窮極浦攤開雲葉碧  
夕陽蹴起浪花紅暮成画本荆関似望若仙人李郭同  
我是天涯倦游者烏烏高唱酒旗風

十里荷香

荷葉田田露氣清花開不讓錦官城朝霞艷射平畦影  
宿水香流古店名杖履幾逢周茂叔歌詞猶憶柳耆卿  
輪蹄十里薰風路齊向湖天鏡裏行

巢溪春漲

菴花溪水散春郊舊有堯民所住巢帝語偶飛塵一點  
野心同鎖水三交上流飲後清牛日密葉藏來穩樹稍  
不似終南開捷徑此中佳處有誰嘲

龜山晴雪

望遠山疑九肋形年華歷久見精靈撥開雲氣生虛白  
點入天光失太青陰壑常寒冰玉座夜窓堪照藥珠經  
道人鉄脚梅花口幾度吞來醉不醒

卧龍覽勝

張翥

一覽衆山心自空高峰撐出碧虛中人驚虎伏千巖秀  
路狀蛇盤萬壑通雲氣長嘘能致雨澗聲遠聽自生風  
含青積翠遙疑回峭壁巉巖看卧龍

賦得月明露冷鶴歸遲

應季考

盧敬丹

雅興天開放鶴亭翩翩踈影下秋屏繪衣早入三公府  
流響偏高九子鈴明遠有情吟作賦浮邱善相著爲經  
雞群終寓邱霄意不比尋常月露形

龍闕略

張洵

傳聞龍闕幾千秋入峪曾無碧水流人慕三皇惟見頽  
兵連五季不知愁雲飛古洞層層幻花滿懸岩處處幽  
縮秀石門堪入画此身疑向洞天遊

又

景仰集元 卷之三十四  
攬勝無如此勝遊華公廟貌足千秋嶙峋已訝峰巒峻  
委折還驚洞壑幽百級登臨通絕頂斷橋飛度轉危樓  
晨鐘一發雲烟合疑有神龍聽祝由

巢溪春漲

喬瑞圖

洗耳芳踪尚有溪白蘋汎汎草萋萋遊魚自躍桃花浪  
好鳥爭鳴綠柳堤指點殘碑憶舊史徘徊初月印新泥  
胸中多少浮沉事悵望高風一破迷

汾流晚渡

襄城郭外古汾川客立夕陽呼渡船孤鷺數聲鳴早月  
輕帆一片掛蒼烟蕭堤花柳微茫出巢父村墟隱約懸  
臨泊莫嫌歸路晚笑尋前渚酒家眠

飛虹雨霽

跨澗卧波果似虹高拖天半倚晴空曉來孤峙奔雲外  
雨後雙懸落照中懸落星辰五尺近往來秦晉一橋通  
行人不識神工巧笑指清波卧蟠螭

三澄雲峰

峩峩三豎掃雲端往來行人天際看晚接夕暉藏峻嶺  
朝含爽氣籠層巒禪房寂歷松枝老澗道幽深虎豹殘  
覓得許公濟勝具煙霞處處任吾餐

和趙明府喜雨韻

張泰來

飛鳥歸來魏豹城隨車甘澍一時傾黍苗沾澤千畦潤  
澗水添波兩岸平不向漁郎催急渡先呼野老課深耕  
村村傳說龍師至童叟歡迎社鼓鳴

襄陵道中

劉 聚 郡守

攬轡城南沙路遙看花芳圃不須招風流猶愧東坡老  
尙與漁人爭渡橋

十里桑田信馬蹄軟風遲日綠楊西流鶯似愛春光好  
飛向堯花枝上啼

晉橋梅月

四首  
七言絕

王 梅

吞吐仙風溪水寒梅魂月影此中看道人指出人方識  
何必曾留玉洞丹

三年酒債淡相安賓主遭逢古所難瀟灑似梅清似月



襟期画出與人看

今古風流各不群詩人仙客亦何分高談朗朗噴明月  
隱有梅花香可聞

仙踪隱隱繫愁思誰憶仙跡未有時道士三年豪飲興  
溪山曾不異今茲

雨後勸農

趙懋本

甘霖霑足遍郊原露冕巡行日未暄舉趾有人耘綠野  
晚犁無地不烏犍傾觴犒飲沿村醉饁食摩肩繞路誼

從此盈室先得兆咸歌豐穰逐迴轅

詞擒昌邑乘載先賢數人各拈小詞詠之白墮得附亦  
列傳收方技之意也調寓憶仙姿

席老師

萬樹

天子門生榮矣此老門生天子傳姓不傳名擊壤一歌  
而已高士高士只合逃名如此

巢父

不讓有虞風動將聽胤朱器訟洗耳結巢栖巧避此生  
無用樊仲樊仲贏得一牛名重

張良

秦怨自應難道韓祚也知終斷六國印旋銷豈是爲韓  
高算歸漢歸漢只了一推公案

賈逵

父子賢奸全異一地兩般竒事梁道自醜儒却以賈充  
爲嗣安世安世乃是張湯之子

鄧攸

存姪棄兒堪憫買妾得甥尤苦天豈果無知留得一名

千古房杜房杜有後轉傾門戶

劉白墮

古說杜康儀狄釀法不傳今日桑落對紅蕖惟爾鶴觴  
如密歡伯歡伯莫謂酒家微術

襄陽縣志卷之二十四

新增詩

深秋

楊維棟 邑人

深秋白露垂涼風砭余肌布袍縫旋綻遊子待授衣  
 側聞茅簷下夜窻理殘機痴夢歸鄉郡單身投柴扉  
 飢寒呼父母涕洟如嬰兒悲聲驚夢覺依稀有鳥啼  
 清明過巢溪見田者用許太空韻

榆柳影交加晃漾魚戈壁緬然無懷公古風還堪繹

沿途訪高踪仰止覈名實多應悲前賢相繩一何切  
熙熙原上田桔槔成舊業噴薄逸林端翠條落明瑟  
悠悠路傍人我亦事的饒

秋懷

濛雨正懷人日夕秋復晏鄰鐘風煙外黃蘆披兩岸  
借問停舟處雁唳楓葉散蘭東將寄誰坐起忽長嘆  
我欲出門去積潦渺河漢我欲高卧去水簟涼如灌  
肝胆原無多因此反成礮樽酒何能爾憂思割一半

雜感

仙子牽白鹿約我水雲外我疑未能往銅履棄滄瀨  
塵心日時增緩緩失幽介滑滑注逝波未覺雲中快  
偶披篋中書違心不堪噉叻叻在何所清爽擬天籟  
欲往何得爾反覆真無賴

飲酒

槐花點清池吐吐汚牛口欲落半未落懸空未覺醜  
與子坐水閣把杯無言久一飲期酩酊醉來舞雙手

持手向人前陳辭顏何厚悠悠千秋業與子常相守

古意 三首

烟雨滿春梨無地種相思拾得青杏子教儂亦皺眉

郎愛芙蓉花南塘花最深不知妾心苦那解惜花心

夜寒頻剪燭王孫酒未醒雞鳴清霜下莫怨妾無情

餞春陔譚邑侯榮調河津詩

柴友芝 邑人

興文教

獨振文翁化荒郊闢草萊

姑汾書院向乏經費下車後即捐廉以為山長修金

諸生膏火現復捐廉貳百兩勸紳士共捐銀壹千兩

貳百兩以為長久之計五年內共捐銀貳千兩

前成李蔭

一時會課者咸知名士生童不下百餘人前後兩科皆有獲雋者稱盛事焉

爨

下識桐材

余濫竿山長而自媿謏陋莫補高深

玉向藍田種珠從合浦

來 隣邑聞風亦有應課者

登龍欣在望多士願追陪

河津為古龍門

蘇困窮

杼柚民財竭孤身任怨勞

邑之兵差協濟霍州詳請折價每年省錢無算團鍊

器械旗幟皆由捐俸措置得法民樂從事

新恩消虎苛

撫差紅毡探馬諸費盡行裁去

舊

敝息鴻嗷

倉谷無力繳完者俱行豁免孤寡者盡行指名賑濟

宦蹟平河壯官

聲姑嶺高口碑千載在四楚沐郇膏

守清廉

卓異標三晉頭銜兩字新

本年撫憲大計通省卓異第一

野多馴雉

化

狼害極多不入於境

門少饋魚人

私謁一概不通

澤沛千家雨心清

兩袖塵從茲乾壁道遺愛結斯民

深撫字

父老攀轅切

遮行旌者數萬人

離情載路傳

設香案者數十里前後邑侯未

有盛於斯者

殷勤千尺水澹泊一文錢荷里吹香日

邑之入景

內有十里荷香

棠陰話別年回頭相慰藉何日不青天

查災雜紀

光緒三年八月二十八日下鄉清查貧民戶口

郝登雲

匹馬馳來東復西傷心最是此蒼黎名非飾義甘薇

蕨卦未逢凶據蒺藜

田野間男婦三五成群掃蒺藜挖草根者所在皆然

哆口

似蠶爭食葉

諸木樹葉採食殆淨

曲腸如蚓半含泥

甚有食乾土者

而

今世態開生面好醜雖殊菜色齊

呼張喚李暫開衙吏役排班子細查謹奉科條分次

第強緣肥瘦判生涯

分極貧次貧

題門有字甘昆鳥

門上書貧

民字 註冊無名作怒蛙 有非貧民而删除者爭之幾欲攘臂 垂首自憐

還自嘆冷官何以報

皇家

嶺梅將放菊初殘大地風光逐日看人比黃花形更瘦野無青草歲將寒餐英作食從權易披草為衣返古難屈指光陰驚轉眼幾回搔首幾長歎

鑿井耕田擊壤詞胡今鼓腹盡啼飢青天有意休搔首赤子無知浪蹙眉召癘總歸人事謬好生方賴帝

心慈從今早作回頭想俗自敦龐福自貽

水村山郭駐行旌里老紳衿夾道迎官愈微時偏作態學經荒後更矜情疏窻浸月增寒色老樹驚風作怒聲最是秀才多狡詐搜奇問字夜三更

古道崎嶇暮色寒坡如峻坂走如丸車經覆轍翻身易馬勒臨崖駐足難 由宋村到中梁村路經高坡馬逸車覆幾遭不測 眼底

風雲爭下達耳邊人語祝平安這回幸得身無恙造物猶憐一冷官

冷齋紀事

典盡春衣更換貂昨朝已度度今朝米空瓦甕連塵  
掃柴伐花枝帶葉燒充耳不聞荆婦嘆低頭偏讓膳  
夫驕而今別受夷齊戒枵腹工夫勝折腰

述懷

不立巖廊不澗阿是儒是吏是頭陀客嫌署冷交情  
淡鳥惜人孤別調多百感都從閒裏積一年半向夢  
中過青氈藉作蒲團坐好唱先生踏踏歌

幾回追想幾躊躇慚愧今吾異故吾廿載光陰同逝  
水一行作吏但徒舖詩因解悶隨風捕酒爲消愁逐  
日沾回首平生歌負負雪花飄落滿頭顱

頭腦冬烘面目竒自唾人地兩相宜算來職業殊鞅  
掌論到生涯但蹙眉萬事無如窮易困一生惟有俗  
難醫偶然抒寫牢騷句說與同人共解頤

遊龍子祠

鄧惠  
邑人

清音亭上好風光洞達真生六月涼我欲盪傾陶令



酒詩成醉卧聽滄浪

搜羅古蹟孰留餘殿閣成聯辨自如  
有客識丁翰隸篆葫蘆依樣學抄書

古院深沉鎖舊愁閒來到此喜登樓  
推開戶牖清風入萬疊雲山豁遠眸

高樓洞達廠瓊筵比戶鱗塍俯目前  
樽酒喜開詩界有人稱是望中仙

源探山曲幾回看蹴石披荆路屈蟠  
蟻穴蜂房隨

湧涓涓細滴不勝寒

珠跳細響是源頭數武才過湧大流  
灌溉同稱神澤

沃不知旱潦祇豐收

石上土敷石下泉安排妥貼自何年  
農家最利千塍

韭種植功成上上田

郊遊雜詠

光緒六年夏月偕友人遊郊外見黃雲遍野翠稻連疇迴憶三四兩年赤地成災時

令人驚喜欲絕因隨所見綴詞以記之

徐清瀾

黃雲翠稻遍原田共說今年勝往年  
囑付農人好耕

作但勤人事莫貪天

綠樹陰中野鳥鳴呼晴喚雨復催耕老農不解詩書  
語慣向枝頭辨鳥聲

瑞麥如雲遍地黃丁男子婦共登場場邊野老逢人

話慎勿寅年吃卯糧自遭大祲後家家務  
留餘粟不肯盡售

事非經過不知難從此人情改眼看惟有西疇傭作

者嫌人每飯不加餐傭工身價較昔增倍且飲食必  
求豐腆稍不如意即辭去矣

送慶明府特庵調任之高平

十載神山治已成曾由浮山  
調高平陽春有脚遍春生官臨

去日方形愛政到和時乃見平行李一肩琴共鶴約

身三字慎兼清為霖久慰蒼黎望快覩兒童竹馬迎

襄陵道中有感

隱隱鄉邦結寸腸備荒有策等無荒隴頭已帶葱菁  
綠人面全消菜色黃飢溺心同霖雨切農桑課併歲

時忙

皇仁漸被千家足子惠元元頌爾康

成化丙午修志姓氏

知縣李 咨

邑人范 晟

隆慶戊辰脩志姓氏

知縣宋之韓

邑人趙景祿

王 騰

吳 崇

李 蘭

高 魯

趙夢弼

杜 綰

崔 泉

吳 肯

康熙癸丑修志姓氏

知縣謝國傑

邑人崔瀛

喬運閔

王升秀

趙鴻漸

崔爾瞻

張鳳儀

張鉞

雍正壬子修志姓氏

司修

知縣趙懋本

舜勗順天大典人

同修

教諭鄧兆鳳

苞九靈邱人

訓導景九錫

晉公芮城人

鑒修

典史張涵

澤寰原天人

纂修

邑人盧秉純

性香

參閱

邑人程昶

暉明

王梅 羨臣

張卯 見仁

分纂

邑人喬瑞圖

滄洲

叅訂

邑人劉漢文

天章

王國瑞

子玉

徐宏

任可

黃旌畧

著三

朱永年

資訓

編次

邑人盧玠

君錫

王賓予

德佑

張冲極

拱辰

較閱

邑人許成漢

端士

正訛

邑人盧敬升

天誠

訂正

邑人賈璋

平玉

徐遴士

簡在

柴惟馨

桂園

柴友通

梅仙

張泰來

陸交

劉居敬

翼長

司刊

邑人張

璣 在璿

李治國 平侯

繪圖

邑人郭拱翼

次張

協理

邑人安

寅 定夫

光緒庚辰修志姓氏

總修

知縣錢

墉 雲南昆明人

纂修

教諭郝登雲

祁縣人

參訂

訓導王培厚

永甯州人

監刊

典史吳

塘 河南濟源人

編輯

邑人徐清瀾

張廷楨

孫毓琛

孔維誠

關承先

席子容

監修

邑人梁藍田

校對

邑人梁藍田

雲南人尹寶書

採訪

邑人薛邦柱

曹慶墀

關德建

周兆岐

劉琨

劉維綬

吳圻南

陳常

翟景濂

段聯成

武先之

張爾聰

賈逢辛

韓長敏

趙鑑庚

張紹基

舊序

明李咨邑令

人謂志為紀事之書不可不作也夫固不可以無作亦不可以徒作以其足以紀一邑之山川之疆域之職貢人文之類耶此固不容於不作矣然其灼去取別詳畧等輕重而得夫體要焉者是豈可徒作矣乎襄陵故志手藁十數葉不知昉於何時而作於何人中間該載者纔城郭官寺田賦之數事耳且多脫落闕典曠時似有待而然也廼於視事之讌謀及儒學師生相與肆考古



今傳記博采圖經誌典質諸故老士夫見聞間附已意  
電勉從事越三月而告成爰分一十九卷用錢諸梓俾  
游覽者一展閱間有以知夫斯土風俗之美人物之雅  
貨殖之豐與凡襄之所有無不燦然於目則是編之作  
於是邑似有毫髮之補矣第念萬卷非鄴侯秘書非世  
南兼之桑田滄海事蹟漶漫一時之考究容有未精去  
取容有未當詳畧容有未審輕重容有未倫掛一漏百  
殆未免夫徒作之誚也雖然測海飲河憑依分願姑書

此以俟後之博雅者續教焉

序

索 睿 教諭

成化壬寅春進士故城李侯來補襄陵令再明年政通  
廢舉乃有事於縣志而睿及邑之士范晟者幸在考核  
列書既成謂睿宜序其後睿聞物之顯也有時而事之  
成也有數是志之作雖曰人力之所爲若無預於時與  
數者然其間或愛惡之不齊或事勢之相戾似亦不能  
不有待於時與數焉不然則平陽屬地爲州者五爲縣

者甘有四襄陵風土文物甲他處何其宜顯而久不顯也然則是志之所作將謂爲令者無人耶則前此者華亭薛侯德良歷城張侯用和皆以文章政事名雖嘗銳意於斯然終以弗久其任不果將謂世經多故耶則吾侯自下車來洊值凶年政務繁劇他之爲守若令者竭心力以拯一時之危且不暇前此之年未聞有如是之急者而吾侯是志竟成於此用是觀之則庸所謂必有待於時與數者果真也耶雖然天下事待乎人爲者什九待乎時數者什一吾侯是志之成雖不能不有待於時數亦豈必有待於時數也哉

序

呂調元 教諭

郡邑有志猶列國有史所以彰往昭來貴實錄也襄邑舊志自成化丙午漳南李公纂述成帙今幾百年未經詮次其間政治之興革城郭之增遷物產之豐耗按圖考跡名實相戾究其大雖名宦鄉賢接踵而興咸未登記識者憫之嘉靖乙丑敬齋宋公來宰是邑識達天人

學窮今古朞月而化行再踰歲適今上嗣位百廢俱舉庶政維新公覽邑志之未備竊有憂焉廼命余偕分教薛君周君鄉先生趙君及諸弟子員萃一館舍欲以博求聞見檢蒐故實沿舊增新纂茲曠典余等承命兢兢然冰惕罔不昕夕咨度叅互考訂祇服匪懈務求確當甫踰旬而一邑之事跡頗具集錄呈公公卽指示綱領剖析類例正是非之分定取舍之極酌衆論而出真見於是缺者增繁者刪訛者易首紀地理繼緝學校而食貨

秩官次之人物藝文又次之展卷披閱星列川流綽有要歸視昔李公纂述之功倍有光焉梓旣成屬余序諸首簡余幸際盛遇故不敢以不敏辭廼作而言曰君子之作志也貴詳而脩而其取人也貴確而精今觀我公是編之裁正雖地域庶類之槩載而于名宦鄉賢之獨慎無乃表古以範今章軌而示趨與使後之官于斯生于斯者或志存經濟而跡邁前脩或身任綱常而踪追往古寧非有感於今日之綜核賢哲而興起矣乎世有

作者則世受其賜我公斯志之脩其有神於風教大矣  
若日勒方域之宏圖揭今昔之勝概廣聞見而無益於  
斯人殊非我公纂述之本意故書之以俟同志

序

國朝 謝國傑 邑令

我

國家治運丕隆車書咸會

聖天子允閣臣請纂輯一統志以昭成軌

詔頒直省郡邑各修紀乘廣資覽擇余不佞備員襄令

捧

上臺檄蚤夜圖維思所以藉手告無罪爰同學博劉君

延邑中紳衿耆老諮焉度焉始以楮筆屬崔君喬文數

輩局鑰事事浹月帖成取隆慶來百念年未載者續之

且於前之缺者補之冗者芟之信則傳而疑則闕之剝

蝕者完魯魚者辨之余繙披再四竊自勗尤自懼也惟

聖天子採風問謠不遺僻壤襄雖彈丸地星垣分麗水界

山屏有民人有社稷在

聖天子函蓋下開卷而閱輿圖將若何固疆域若何瞻戶  
口若何厚風俗建置有志一石一木悉民力之拮据學  
校有志一器一物悉士類之觀瞻貢賦有志一粟一絲  
悉仰供

國儲而下出自耕織之勤勞長邑者爲民力休恤若何  
爲士類振興若何爲

朝廷急徵輸復爲婦子盜井灶又若何昔官茲土者或以  
廉惠稱或以嚴明著不則僅臚爵里等於泯泯無聞噫

嘻水者物之鑑古者金之鑑示余宜法宜戒者其在官  
師一志矣至邑內人物純忠篤孝允足表彰止善徼長  
俱應闡發旁及技藝之流與夫詩文疏記堪傳者一焉  
未備闕畧貽譏司風教者又若何是皆余之責也余敢  
不自勗敢不自懼哉今幸矣校讐諸子抽思展帙克慎  
克詳余得藉手報憲命告無罪矣舉成帙上之郡上之  
省彙而上之

神京知薇署蘭臺必有握青鏤管者俯拾隻字勒之金

版則下邑野乘亦以佐

聖天子同文盛治也敬摭委陋弁之簡端

序

劉宏緒 教諭

余曩署鐸堯山每詣郡城晤襄邑二三良友道其山川  
人物輒心嚮往之歲乙巳以改補承乏此地尋見澄巖  
翠岫碧澗丹壑一時同人翕聚魚魚雅雅竊意余於此  
蓋有夙緣目之所覩無異疇昔之所聞也越明年福寧  
謝公琴鶴西來剖符司牧甫下車政平民悅廼於晉接

之餘顧余而言曰風俗之轉易在人情人情之作新在  
長吏前之所爲後人之師今之所行他日之鑑撫時紀  
事洵守土者之不可緩也茲奉功令允廷臣請脩葺郡  
志以成大一統之模適獲我公素心遂屬余不佞共仙  
洲崔子洎諸子衿輩杜局校讐且語以愛惜珍重之意  
余受事中心怍怍既竣敢颺言末簡按襄志脩自隆慶  
紀元迄今百有餘禩遲之又久未獲縷續者蓋言慎也  
夫溯河源而望斗杓趨粵嶺而循指車州邑之有志其

亦巡方問俗之杓車乎披圖而稽如星垣岳瀆城郭建  
置以暨賦稅戶口諸條例固皆班班可攷而總不外夫  
宦遊之名彥與鄉居之偉儒以爲振興之要故論名宦  
則記其筮仕詳其展布有法律與詩書並用風霜偕雨  
露兼施判如山而不動門似水以常清者若而人論鄉  
賢則綜其家世仰其流風有瑤林玉樹之姿干將莫邪  
之幹弓裘克紹棠棣競芳者若而人遞至羽校燭日旌  
旗流星之傳寔所以壯國威白雲同悠青松共爽之侶

亦足以標高蹈逮夫孝格天地節映冰霜非不戛戛乎  
難之然一念之誠在所必錄皆擗管者所不敢忽也由  
是旣存其人復採其言念此言爲心聲文爲國華當其  
昭肝胆於日星吐珠璣於楮墨無論爲出師爲陳情爲  
弔古寄懷皆有至性行乎其間古今人豈甚相遠哉且  
諷吟一道上叶國風詩以山川爲境山川亦以詩爲境  
名山遇賦客何異士遇知己一經品題情貌宛然所以  
馳熊軾於谷陽歌驪駒於祖道非嚶鳴之誼卽芟棠之

襄陽縣志 卷之二 藝文  
不  
蔭也其疇得而棄之余因是更有思焉雖天下州有九  
岳有五旁而至於大荒無垠之鄉謝靈運李太白諸公  
所未登躡題咏處皆可從我公愛惜珍重之一念通之  
有不難隱几而燎若指掌者太史公所云登龍門探禹  
穴便有江山萬里之勢良以此也則今日之舉不大愉  
快也哉至我公雉馴郊田鸞棲庭樹徽政不可更僕自  
當著聲卓異輝映簡編余且拭目而敬俟之

序

崔瀛邑人

古史中紀傳子長爲優編年君實爲最兩司馬氏皆河  
東人也繼有作者無能彷彿何今古人相去遠甚余小  
子謏陋未獲讀石渠天祿之書間嘗披覽簡冊曠世興  
慕亦竊以無媿古人自期許茲值邑侯謝父師奉憲檄  
重脩邑志謬以編摹見屬余共諸文學鍵扃受事相矢  
冰兢思此一邑之乘將資史館採擇而且傳信後世何  
敢輕易濡筆取舊志再四繙閱乃知境內事例咸宜詳  
核而尤難尤慎者莫逾於追論昔之官師人物諸如輿



圖貢賦及建置藝文可按圖稽按籍攷偶有未備罪止  
疎畧耳若十百年以前之人由十百年以後論之論其  
人之心而論人者之心見焉論其人之品而論人者之  
品關焉一字溢美則得罪於名教一言掩善則得罪於  
鬼神我得取前人筆之曰某也忠某也廉某也孝義某  
也節烈後之人又得取是志而指之曰其論某也直其  
論某也曲其論某也公其論某也私其論某也是其論  
某也非噫嘻此何許事顧敢輕易濡筆乎用是博詢行

實詳加品隲一字一言務協公論聽雞鳴而攬衣剪燭  
花於午夜歷月者再始脫藁成集于舊志仍者半裁繁  
辨訛者半自隆慶迄今茲則分例續補其染毫灑墨類  
出文學諸君子訂正于庠師鑒定于邑侯余小子廁身  
其間折衷寡當極深汗媿於才於學於識無一有焉若  
僭若濫若亂庶幾免乎以是上之史館或俯覽而節錄  
之則燃藜火搦彤管自有子長君實其人者

序

李 暉 郡守

襄陵縣志 卷之五  
邑之有志非誇多闕靡之書也蓋欲陳星文之向背氣  
候之蚤暮土田之肥瘠戶口之盈縮風俗之醇漓人物  
之盛衰城郭祠宇之修廢守令丞簿之賢否以是而獻  
之

朝廷布之百司俾有守土之責者相其機宜因其情勢裁  
成而左右之以成比戶可封之俗法至良意至美也予  
於辛亥歲恭膺

簡命來守平陽十二屬之人物山川固已約畧胷中矣襄

陵趙令以修志上請欲予董率其事予告之曰令亦聞  
縣之所由名乎縣者懸也一境之精神命脉皆懸於一  
令之手也且亦聞知縣之所由名乎知者識也一境之  
隱微曲折皆識於一令之心也知之明處之當邑令之  
能事畢矣卽予亦得藉手以告無過矣襄陵爲平郡次  
邑凡所爲星文氣候土田戶口等其懸象於天而成形  
於地者固無大改於今昔也而所以相天因地致星文  
之表瑞氣候之均調土田之沃衍戶口之殷實風俗之

醕良人物之秀偉城郭祠宇之堅好守令丞簿之賢能者端在人事之振興耳我

皇上勵精圖治薄海從風久已臻重熙累洽之治矣其奉行德意宣揚教化者則良有司之事與賢薦紳之責也志中所列爲名宦與鄉賢者伊何人哉卽今修志之邑令邑紳均係乎風俗人心之重焉一展卷而得其要會之所存並得其景行之所在則今日之致羨於前人者未必後人不致羨於今日也使徒視爲誇多鬪靡之文

辭而已與予整躬率屬並邑令化民成俗之意夫豈有當哉因次其語於簡端

序

趙懋本  
邑令

古者太史掌風詩採四方之歌謠以察爲政之得失風俗之貞淫司徒掌邦土辨九州山川平野之肥瘠以示民播種之宜列國各有史賢則褒而否則貶以示千秋之法戒後世置郡縣遂有一統省郡邑志其詩歌必錄貢賦必詳官師人物必書兼三者之長而用之所係顧

不重且難歟至邑志更有重且難者一統郡省之志患其不簡邑志患其不詳一統郡省之志患其採之過畧邑志患其擇之不實余獨謂一邑之志詳諸志之簡簡而精者也一邑之志實諸志之畧畧而嚴者也誠哉邑志之重且難也余以庚戌之春蒙上憲拔舉

聖天子之簡命改授襄邑甫下車卽取邑志披閱以爲因革損益助自歷代以至康熙癸丑以前之記載得其梗概至癸丑以後蕩然未書竊以襄陵密邇平郡風號陶

唐其間山水形勝之雄生齒土物之盛與夫人物之忠孝節義文章之挾藻摛華蓋有日新月異彌進而彌上者况經地震荒禘諸多滄桑其宜續而修之也尤亟敢不竭蹶從事顧余材愧三長技歉一割簿書鞅掌深以不勝任爲懼茲歲春歲和民豐郡憲下臨襄邑因邑乘歷年久遠當急爲重纂命余董其事因集邑紳士謀指俸以成是役會太史盧公告假歸里請扁鑰司纂同事者則司鐸鄧君等分纂則蒲臺程君賢書張君等明經

則劉君王君等文學則賈生盧生喬生等余同諸君盟之神明質之幽獨取舊志之缺者補之繁者簡之以衷其當取新事考之校之以求其實余于公餘亦細爲校讐上報郡憲蒙鑒定集其大成數月告竣分卷二十四庶乎其詳且實矣竊幸斯邑六十年來沐浴

聖化歌咏太平雖山川如故歲月遷更於城郭見其重新人民見其蕃殖皆

聖天子賑恤于災禮之時休養於平成之日而生之聚之者也於官師見其有以循良稱有以明敏著皆膺

簡命以蒞斯土治斯人者也於鄉賢有許主政之醇謹端正張春曹之清勤任事皆本山嶽之鍾靈文教之培養者也于忠義孝弟祠或靡盬于王事或敦篤乎倫紀或砥廉隅或勵名節斌斌乎皆一鄉之善士順則之良民也至於藝文上之載乎道義次亦關乎興廢絕無浮靡淫哇之聲不失爲朴素之遺焉猗歟盛哉余慨然有思焉思襄陵民雖貧而儉俗雖朴而良何以使貧者富儉

者禮朴者醕超三代而上媿乎唐虞無負

聖天子加意司牧之至意雖然民之與也視乎上政之成也  
也因乎教仁漸義摩之久士民於變物阜財豐亦下邑宰之光也至若人文蔚起俗登上理又下邑宰之望也是為序

序

盧秉純 邑人

襄陵為平陽次邑密邇堯天依切舜日四表上下格被獨先芸芸者皆帝世之民也邑之先有老人歌於路曰

日出而作日入而息耕田而食鑿井而飲帝力何有於我哉此為陶唐氏之史即為陶唐氏之志矣閱四千餘歲而至今日雖郡邑沿革不一然而出入猶是也作息猶是也田井猶是耕鑿猶是飲食亦猶是也襄邑之志即以老人之歌誌焉奚不可也志輿圖則田與井之所由畫乎志建置則作與息之所由庇乎志學校則出與入之大經所以稟承者乎志貢賦則耕與鑿之美利所以獻納者乎志官師則代帝而宣其力而謀民之飲食

且不止謀民之飲食者乎志人物則計日而程其材而  
閑已之出入并不止閑已之出入者乎志襍記志藝文  
則靈異之迹不必爲老人之事之推而渾穆之風亦皆  
老人之歌之類者乎况夫元會運世皆日與日之所積  
而成齊治均平胥帝與帝之相沿而治今固猶是日也  
則亦猶是帝耳帝在而輿圖之志且可以參義畫矣  
建置之志且可以參有巢矣學校之志且可以參虞庠  
矣貢賦之志且可以參禹貢矣官師之志且可以參周

官矣人物之志且可以參高陽之才子雜記之志且可  
以參安邑之神鼎藝文之志且可以參太古之結繩矣  
一邑者天下之推一代之準此志之作區區襄  
陵云爾哉然則幸生堯舜之世幸踐堯舜之土亦但與  
爲作息與爲耕鑿與爲飲食焉耳尙不知帝力之何有  
於我又焉知當年之歌今日之志之何有於帝力耶

增修襄陵縣志序

邑之所以有志者豈僅備典章供披覽已哉紀山川所以稽幅員之廣狹紀疆里所以考賦役之重輕紀學校以觀其教化紀風俗以識其轉移而且歲時之災祥紀之以示修省物產之豐耗紀之以別土宜與夫士女之芳規淑行紀之以彰風化而昭激勸無非所以爲政化計也而守土者遂得藉此以鑒得失定從違焉縣志一書不綦重歟余自庚午歲來蒞斯邑披攬舊志增備於



雍正壬子歲後百數十年紀載茂如兼之版片凋殘亥  
豕滿紙屢欲修輯自愧才識舛鄙又日紛擾於簿書錢  
穀之間是以有志焉而未逮越己卯爵撫憲曾奉

命纂修通志因檄下各州縣於舊志外續爲草檢以備  
采擇余於是設局採訪邀邑紳之在籍者屬已校讐而  
以廣文郝君總其事拾遺補闕按類編輯閱數月而舉  
百餘年廢墜之典一旦燦然布列此固諸君子纂輯之  
功余亦得藉手而上覆 憲命矣獨計余自承乏以來

屈指已將一紀舉所云固疆圉慎封守興養立教易俗  
移風及平賦均徭與一切利民益治諸庶務其有待余  
振勵而變化之者遠徵近譬滋吾愧也實甚然而咨獻  
徵文益信典型具在循名核實咸知利弊所存異時之  
繼余而蒞茲土者就民情之所已見鑒吾政所未能救  
弊補偏釋回增美卽以此書爲余舊政之告也可是爲  
序 時在

光緒辛巳歲孟夏月上澣知府升用候補直隸州知

襄陵縣事昆明錢墉撰

增脩襄陵縣志序

邑之有志上以脩 朝廷之采擇下以著一邑之典章

其紀述不可以不詳考核不可以不精體例不可以不

嚴論斷不可以不當典誠鉅典事為盛事詢非胸藏二

酉技擅三長未足語於斯也光緒己卯歲 邑侯秋垣

錢公奉檄增脩縣志過蒙推許而以其事屬 雲 噫此何

許事俾 雲 濡墨拈毫何異下里巴人妄試鈞天雅奏也

哉固辭之不獲命迺與同事諸君子遠紹旁搜按照舊

志原分門類挨次編輯間有繁略過當者泰酌而損益

之數閱月始獲成帙覆瓿之譏固所不免而義例雖疎

故實粗脩仰副 邑侯責成之意以脩通志搜討之資

學識所至力不容強 雲 所可告無罪者技止此耳若夫

益前人所未至啟後學於來茲俾採風者披卷而喜文

獻之足徵稽古者探冊而信典型之具在彌吾罅漏成

此完書是所望於後之有志掌故者肯

光緒庚辰年嘉平月上澣襄陵縣教諭郝登雲撰

舊跋

趙景祿

邑人

周禮列國有史所以闡章程昭物采表儀文明軌範也  
 今之郡邑古之列國也寧無記載者乎故志作焉在天  
 下有一統志在省藩有通志在郡邑各有志且志之作  
 才非雋永學非淵宏識非精鑑者不足以語此吾襄之  
 志作於憲廟御極之丙午迄今八十載餘世遠蹟湮闕  
 漏未備者班班也吾侯敬齋翁抱唐虞之大道貫天人  
 之實學德操孔孟才媲伊周應宿持檄尹茲最邑不期

襄陵縣志 卷之二 藝文志  
年而政成化洽乃注意典籍因覩舊志而嘆曰志有未備則政教無稽文獻何徵殆史家之闕典也烏乎可於是詢茲庠彥之博識者若王生騰輩八士指示條目教詔方畧真良史之家法也又命余總裁其事顧余謏薄固陋愧之班馬之識徒慙管彙之窺自量無補辭命弗獲遂借諸彥補塞殘缺月維及期乃編成帙事以實書詞不華飾是是非非鬼神可鑒而百年之公論炳若日星俾後之觀者指曰某宦業之盛某節義之高某儒術

之深風俗之轉移政治之隆替必有感發而興起者焉然事跡之始末固有大觀者以揄揚之矣茲不復贅他若學校之增脩學田之創置均徭之公審催征之良法接遞徂民馬以紓力役之困城池包磚石以固封疆之防大而綱紀之振肅小而條目之森嚴遺愛多端口碑滿路固在觀風者采焉以爲明天子獻行將明揚褒美不次顯陟殆非余楮之所能悉也侯諱之韓裔出古鄴之武安世宦華胄也登乙丑進士散齋其別號云

跋

襄陵志修於

張

卯

邑人

國朝癸丑迄今甲歷一週矣兩值大祲一丁地震凡規制之因革損益人物之芳躅懿蹤其當徵信而傳後者甚夥前歷任邑侯咸有志焉而未逮也今我邑侯趙公以製錦宏材蒞茲彈丸二載以來政通人和百廢具舉乃集邑之諸人士採輯纂修以揚我

朝同文之治以成一邑文獻之興甚盛事也余小子謏陋

何能謬與編摩之列願拜手而颺諸簡末焉曰天下事不慮其難艱鉅弗辭則難者亦易亦不慮其弗成實心任事則其成尤速夫事有似緩而實急似迂而實切于治者邑志是矣昔蕭何入關先取圖書班史志地里兼及民俗邑之有志所以啓治忽而脩省鑒者也一邑之中天星地紀戶口風俗人物文章无不脩具鑒於星象可以察妖祥之兆鑒于地紀可以辨三壤之宜鑒于戶口田賦可以驗盛衰而觀得失鑒于人物而忠孝節義

之行可師也鑒于風俗而好樂先荒之咏如昨也鑒于  
人文而春華秋實之藻可采也志之宜隨時纂修也要  
矣雖然志文事也承平則修明倥偬則廢閣且卽當久  
道化成物阜民安之日而因循者或視爲迂濶而不切  
于時務也况志以翼史非三長兼優與心切民瘼者未  
易信今而傳後大有補于風教也我侯斯志簡而旡漏  
詳而有要制則典也質而不俚贍而不穢文則雅也是  
非不謬名教攸關體則嚴也至弁言簡端尤惓惓于民

風土俗而于官師三致意焉侯之心切于吾邑之民爲  
何如耶其所以子惠吾邑者夫寧有艾耶余小子欣逢  
斯盛珥筆其間惟從諸同人采訪而編次之若夫筆削  
之精論定之嚴攷核之確則一出我侯巨手復何能贊  
詞但仰體我侯捐俸命梓殫精點定之誠咸不膏繼  
晷以從事是以數月而梨棗以畢余樂觀厥成不覺慨  
然興嘆白志之裨于吾邑也大且永哉獨是向之蒞任  
諸公或籌及焉而弗果或將有事焉而輒阻而我侯一

舉詳審精密豈斯文之繼固必待其人耶抑實心任事  
弗辭艱鉅故天下事皆无難成者耶余蓋極爲我侯贊  
而深爲吾邑幸也

舊跋

梁藍田邑人

謹按縣志創始于前明成化丙午重修于

國朝康熙癸丑自雍正十年續修後迄今百數十年于茲  
矣前邑侯譚公慮文獻之無徵也將欲起而編輯之事  
未果而調河津任矣因嘆天下事作者固難述者亦自  
不易究之事無難易惟視司此事者之識何如耳識其  
人而善任之雖難亦易不識人而誤任之雖易亦難惟  
我

邑侯錢老父台能知人尤善任人光緒己卯歲我侯奉檄纂修縣志卽于縣城之聖壽寺設局採訪因以其事屬我

郝老夫子未數月舉百數十年廢墜之典燦然大備噫均此事也前何若彼之難今何若此之易哉非我侯知人善任曷克臻此然侯之知我夫子也豈自今始哉前次辦賑時已知之深矣知夫子勤慎任之以查災知夫子廉介任之以放賑數年來忘食忘寢我侯勞心于內

矢公矢慎復得我夫子宣力於外以故俾千百年不經見之事一旦措之則正施之則行以視夫他人之竭力經營而終不免譴責者其舉事之難與易何如哉余不敏夙荷垂青兩效奔走于其後仰見明足以知人者我侯也力足以任事者我夫子也非我侯不足以知我夫子之爲人非我夫子不足以成我侯之素志古所稱和衷共濟同寅協恭其卽我侯我夫子之謂也夫茲當剗劂藏事之日謹綴數語于簡末非敢云闡揚盛美也



聊以寄夙昔景仰之意云爾

襄陵縣新志跋

計自邑乘增脩至今閱數十寒暑是書也備載地理之  
廣狹人文之盛衰賦役之簡繁政治之得失與夫義士  
仁人孝子節婦之足以礪世磨俗者尤期蒐羅而靡遺  
關係顧不重哉我襄風俗敦龐自兩漢以迄明清醇儒  
名臣代不乏人洎乎民國成立率由依舊而氣象維新  
迨長安李淞平來宰斯土極力整頓頻年因革損益動  
中機宜學校徧設人才輩出大有蒸蒸日上之勢焉

瑾

一介迂儒素乏經驗謬蒙賞識得隨諸君子後濡墨沾  
毫續貂之誚在所難免若夫拾遺補闕是有望於後之  
賢者

邑人賈懷瑾撰

襄陵縣新志跋

縣之有志猶國之有史也然作史者須  
考制度審憲章述生理亂興衰是非得  
失博聞而強識之苟非名流通儒不敢  
操觚從事志則紀述事跡摭摭見聞採  
而錄之以備遺忘蓋即述而不作之意

非如史之大書特書以一字定褒貶嚴  
褒鉞也吾襄舊志自清光緒庚辰增修  
後垂四十餘年矣去其間不第改革遞  
擅變感滄桑有待蒐葺而且版片殘缺  
散軼失墜續而修之也宜 傑不敏謬承  
淞平李公暨諸同人之推許用敢不辭

膚淺聊參末議凡採訪編次既遵新頒  
之凡例而拾遺補闕仍循舊志之成規  
證實者從之傳疑者不錄為卷二十有  
四後之君子儻能旁搜遠紹增益其未  
備窮究所未竟俾典章文物燦然可觀  
則是帙六不無毫髮之助也謹綴數語

於簡末云

邑人單廷傑謹跋



Faint vertical text, likely bleed-through from the reverse side of the page.

原件收藏

湖北省图书馆

原件书号

地 435

原件状况

原件完好

襄陵县新志 二十四卷

李世裕修 刘师亮纂

民国十二年铅印本

八册

本部书共摄制 2 卷

2:1 卷首~卷23

2:2 卷24

版权所有 不准复印